

宋史

七



本紀卷第二十五

宋史二十五

開府儀同三司桂國錄軍國重事前書右丞相兼修國史領經筵事都總裁等奉  
勅修

高宗二

二年春正月丙戌朔帝在揚州丁亥錄兩河流亡吏  
士沿河給流民官田牛種戊子金人陷鄧州安撫劉  
汲死之辛卯置行在權貨務壬辰金人犯東京宗澤  
遣將擊卻之癸巳復明法新科甲午詣壽寧寺謁祖  
宗神主乙未金人破永興軍前河東經制副使傅亮  
以兵降經略使唐重副總管楊宗閔提舉軍馬陳迪

轉運副使桑景詢判官曾謂提點刑獄郭忠孝經略  
司主管機宜文字王尚及其子建中俱死之東平府  
兵馬鈐轄孔彥舟叛渡淮犯黃州守臣趙令歲拒之  
丙申詔自今犯枉法自盜賊者中書籍其姓名罪至  
徒者永不錄用金人陷均州守臣楊彥明遁去丁酉  
金人陷房州己亥張遇焚真州祕閣修撰孫昭遠爲  
亂兵所害庚子遣主客員外郎謝亮爲陝西撫諭使  
兼宣諭使持詔賜夏國張遇陷鎮江府守臣錢伯言  
棄城走辛丑內侍邵成章坐輒言大臣除名南雄州  
編管金人陷鄭州通判趙伯振死之癸卯金帥窩里

嗚陷濰州又陷青州尋棄去丁未詔諭流民潰兵之  
爲盜賊者釋其罪己酉禁諸將引潰兵入蜀置大散  
關使以審驗之庚戌遣考功員外郎傅雱爲淮東京  
東西撫諭使辛亥王淵招降張遇以所部萬人隸韓  
世忠改授顯謨閣直學士孟忠厚爲常德軍承宣使  
詔凡后族毋任侍從官著爲令金人焚鄧州是月以  
中奉大夫劉豫知濟南府金人陷潁昌府守臣孫默  
爲所殺經制司僚屬王擇仁復興軍金人陷秦州  
經畧使李復降又犯熙河經畧使張深遣兵馬都監  
劉惟輔與戰于新店敗之斬其帥黑鋒二月丙辰金



人再犯東京宗澤遣統制閻中立等拒之中立戰死  
戊午移耿南仲于臨江軍金人陷唐州壬戌安化軍  
節度副使宇文虛中應詔使絕域復中大夫召赴行  
在癸亥罷市易務甲子金人犯滑州宗澤遣張撝救  
之戰死乙丑澤遣判官范世延等表請帝還闕河北  
賊楊進等詣澤降丁卯復延康述古殿直學士爲端  
明樞密直學士辛未詔自今犯枉法自盜贓罪至死  
者籍其貲壬申赦福州叛卒張員等癸酉金人陷蔡  
州執守臣閻孝忠丙子金人陷淮寧府守臣向子韶  
死之丁丑遣王貺等充金國軍前通問使戊寅責降

知鎮江府趙子崧爲單州團練副使南雄州安置己卯奪祕書正字胡珵官送梧州編管朝奉大夫劉正彥應詔使絕域授武德大夫威州刺史尋爲御營右軍副統制庚申以王淵爲嚮德軍節度使辛巳武功大夫和州防禦使馬擴奔真定五馬山砦聚兵得皇弟信王榛于民間奉之總制諸砦壬午詔京畿京東西河北淮南南路置振華軍八萬人是月成都守臣盧法原修城成三月辛卯金人陷中山府壬辰詔諸路安撫使許便宜節制官吏丁酉初立大小使臣呈試弓馬出官格先閱試然後奏補黏罕焚西京去庚子

河南統制官翟進復西京宗澤奏進爲京西北路安撫制置使丙午遷授尚書右僕射何舉爲觀文殿大學士中書侍郎陳過庭爲資政殿大學士同知樞密院事聶昌爲資政殿大學士並主管宮觀時舉已卒于金昌爲人所殺朝廷未之知過庭亦在金軍中丁未罷內外權局官之不應法者遣楊應誠爲大金高麗國信使己酉張良等復作亂擁衆突城出命本路提點刑獄李訢討捕之辛亥以范瑒權同主管侍衛步軍司公事屯真州是月金人陷鳳翔府守臣劉清臣棄城去又犯涇原經畧使曲端遣將拒戰敗之金

兵走同華石壕尉李彥仙舉兵復陝州夏四月丙辰  
詔文臣從官至牧守武臣管軍至遙郡各舉所知二  
人戊午禁州縣責鄰保代輸逃戶稅役宗澤遣將趙  
世興復滑州乙丑翟進以兵襲金帥兀室于河南兵  
敗其子亮死之進又率御營統制韓世忠京城都巡  
檢使丁進等兵戰于文家寺又敗世忠收餘兵南歸  
兀室復入西京尋棄去隴右都護張巖及金人戰于  
五里坡敗績死之丁卯金人入洛州壬辰軍賊孫琦  
焚隨州癸未入唐州信王榛遣馬擴來奏事是月以  
榛爲河外兵馬都元帥擴爲元帥府馬步軍都總管

五月乙酉許景衡罷孫琦犯德安府丙戌命參酌元  
祐科舉條制立詩賦經義分試法戊子以翰林學士  
朱勝非爲尚書右丞辛卯以金兵渡河遣韓世忠宗  
澤等逆戰甲午曲赦河北陝西京東路福建轉運判  
官謝如意執張員等六人誅之丙申復命宇文虛中  
爲資政殿大學士充金國祈請使賊靳賽寇光山縣  
戊戌河北制置使王彥部兵渡河屯滑州之沙店癸  
卯張懋薨甲辰金帥婁宿陷絳州丁未復置兩浙福  
建提舉市舶司己酉秀州卒徐明等作亂執守臣朱  
芾迎前守趙叔近復領州事命御營中軍統制張俊

討之癸丑罷借諸路職田六月乙卯邛州鑄錢增印  
錢引癸亥建州卒葉濃等作亂寇福州甲子親慮囚  
乙丑張俊至秀州殺趙叔近執徐明斬之甲戌葉濃  
陷福州丁丑詔江浙沿流州軍練水軍造戰艦京畿  
淮甸蝗是月以知延安府王庶節制陝西六路軍馬  
涇原經畧使曲端爲節制司都統制永興軍經畧使  
郭瑱逐王擇仁擇仁奔興元秋七月甲申葉濃入寧  
德縣復還建州命張俊同兩浙提點刑獄趙哲率兵  
討之丙戌詔吏部審量京官非政和以後進書頌及  
直赴殿試人乃聽參選宗澤薨丁亥詔百官坐蔡京

王黼擬授而廢者許自新復用戊子禁軍中抉目剗  
心之刑壬辰選江浙州軍正兵士兵六之一赴行在  
乙未以郭仲荀爲京城副留守戊戌錄內外諸軍將  
士功辛丑以春霖夏旱蝗詔監司郡守條上闕政州  
郡災甚者蠲田賦甲辰以降授北京留守杜充復樞  
密直學士爲開封尹東京留守八月甲寅初鑄御寶  
三甲戌御集英殿策試禮部進士罷殿中侍御史馬  
伸尋責濮州河北京東捉殺使李成叛辛巳犯宿州  
是月二帝徙居韓州九月甲申丁進叛復寇淮西庚  
寅賜禮部進士李易以下四百五十一人及第出身

特奏名進士皆許調官壬辰召侍從所舉褚宗諤等  
二十一人驛赴行在癸巳金人陷冀州將官李政死  
之甲午金人再犯永興軍經畧使郭琰棄城退保義  
谷辛丑陝西節制司兵官賀師範及金人戰于八公  
原敗績死之丙午復所減京官奉丁未東京留守統  
制官薛廣及金人戰于相州敗死己酉郭三益薨是  
秋窩里溫撻懶破五馬山砦信王榛不知所終馬擴  
軍敗于北京之清平冬十月甲寅命楊州濬隍修城  
閔江淮州郡水軍楊應誠還自高麗戊午遣劉光世  
討李成壬戌禁江浙閉糴癸亥黏罕圍濮州遣韓世忠



范瓊領兵至東平開德府分道拒戰又命馬擴援之  
甲子命孟忠厚奉隆祐太后幸杭州楊進復叛攻汝  
洛命翟進擊于鳴臯山翟進戰死丙子罷吏部審量  
崇寧大觀以來濫賞止令自陳是月劉正彥擊丁進  
降之十一月辛巳朔提舉嵩山崇福宮李綱責授單  
州團練副使萬安軍安置劉光世及李成戰于新息  
縣成敗走高麗國王王楷遣其臣尹彥頤入見金人  
圍陝州守臣李彥仙拒戰卻之壬辰金人陷延安府  
權知府劉選總管馬忠皆遁通判府事魏彥明死之  
癸巳趙哲大破葉濃于建州城下濃遁而降復謀爲

變張俊禽斬之乙未金人陷濮州執守臣楊粹中又陷開德府守臣王棣死之以魏行可充金國軍前通問使庚子詣壽寧寺朝饗祖宗神主壬寅冬至祀昊天上帝于圜丘以太祖配大赦金人陷相州守臣趙不試死之甲辰陷德州兵馬都監趙叔旼死之庚戌立士庶子弟習射補官法是月節制陝西軍馬王庶爲都統制曲端所拘奪其印四川茶馬趙開罷官買賣茶給引通商如政和法金人犯晉寧軍守臣徐徽言拒卻之知府州折可求以城降金人陷淄州涇原兵馬都監吳玠襲斬史斌濱州賊蓋進陷棣州守臣

姜剛之死之京東賊李民詣行在請降王淵殲其衆  
留民爲將十二月乙卯太后至杭州扈從統制苗傳  
以其軍八千人駐奉國寺庚申金人犯東平府京西  
路制置使權邦彥棄城去又犯濟南府守臣劉豫以  
城降甲子金人陷大名府提點刑獄郭永罵敵不屈  
死之轉運判官裴億降又陷襲慶府乙丑陷虢州丙  
寅初命修國史己巳以黃潛善爲尚書左僕射兼門  
下侍郎汪伯彥右僕射兼中書侍郎顏岐門下侍郎  
朱勝非中書侍郎兵部尚書盧益同知樞密院事辛  
未金人犯青州丁丑特進致仕余深金紫光祿大夫

致仕薛昂並分司進昌軍徽州居住耿南仲再責單  
州別駕唐恪追落觀文殿大學士戊寅以禮部侍郎  
張浚兼御營參贊軍事教習長兵是冬杜充決黃河  
自泗入淮以阻金兵

三年春正月庚辰朔帝在揚州以京西北路兵馬鈐  
轄翟興爲河南尹京西北路安撫制置兼招討使京  
西賊貴仲正陷岳州甲申以資政殿學士路允迪簽  
書樞密院事丁亥金人再陷青州又陷濰州焚城而  
去京東安撫劉洪道入青州守之己丑奉安西京會  
聖宮累朝御容于壽寧寺占城國入貢趣大金通問

使李鄴周望宋彥通吳德休等往軍前辛卯陝州都  
統邵興及金人戰于潼關敗之復號州乙未杜充遣  
岳飛桑仲討其叛將張用于城南其徒王善救之官  
軍敗績庚子張用王善寇淮寧府守臣馮長寧却之  
詔百官聞警遣家屬避兵致物情動搖者流丙午黏  
罕陷徐州守臣王復及子倚死之軍校趙立結鄉兵  
爲興復計御營平寇左將軍韓世忠軍潰于沐陽其  
將張遇死世忠奔鹽城金兵執淮陽守臣李寬殺轉  
運副使李跋以騎兵三千取彭城間道趣淮甸戊申  
至泗州二月庚戌朔始聽士民從便避兵命劉正彥

部兵衛皇子六宮如杭州江淮制置使劉光世阻淮  
拒金人敵未至自潰金人犯楚州守臣朱琳降辛亥  
金人陷天長軍壬子內侍鄭詢報金兵至帝被甲馳  
幸鎮江府是日金兵過楊子橋癸丑游騎至瓜洲太  
常少卿季陵奉太廟神主行金兵追之失太祖神主  
王淵請幸杭州命留朱勝非守鎮江以吏部尚書呂  
頤浩爲資政殿大學士江淮制置使都巡檢使劉光  
世爲殿前都指揮使充行在五軍制置使駐鎮江府  
控扼江口主管馬軍司楊惟忠節制江東軍馬駐江  
寧府是夕發鎮江次呂城鎮金人入真州甲寅次常

州御營統制王亦謀據江寧不克而遁御營平寇前將軍范瓊自東平引兵至壽春其部兵殺守臣鄧紹密丙辰次平江府丁巳金人犯泰州守臣魯班以城降丁進縱兵剽掠王淵誘誅之戊午次吳江縣命朱勝非節制平江府秀州控扼軍馬禮部侍郎張浚副之又命勝非兼御營副使留王淵守平江以忠訓郎劉俊民爲閤門祗候齎書使金軍詔錄用張邦昌親屬仍命俊民持邦昌貽金人約和書橐以行金人陷滄州守臣劉錫棄城走己未次秀州命呂頤浩往來經制長江以龍圖閣待制知江州陳彥文爲沿江措

置使庚申次崇德縣呂頤浩從行即拜同簽書樞密  
院事江淮兩浙制置使以兵二千還屯京口又命御  
營中軍統制張俊以兵八千守吳江吏部員外郎鄭  
資之爲沿江防托監察御史林之平爲沿海防托募  
海舟守隘壬戌駐蹕杭州金人陷晉寧軍守臣徐徽  
言死之癸亥下詔罪已求直言令有司具舟常潤迎  
濟衣冠軍民家屬省儀物膳羞出宮人之無職掌者  
乙丑降德音赦雜犯死罪以下囚放還士大夫被竄  
斥者惟李綱罪在不赦更不放還蓋用黃潛善計罪  
綱以謝金人置江寧府榷貨務都茶場丁卯百官入



見應迪功即以上並赴朝參戊辰出米十萬斛即杭  
秀常湖州平江府損直以糶濟東北流寓之人金人  
焚楊州已巳用御史中丞張澂言罷黃潛善汪伯彥  
以戶部尚書葉夢得爲尚書左丞澂爲右丞庚午詔  
平江鎮江府常湖杭越州具寓居京朝官已上姓名  
以備簡拔分命浙西監司等官募土豪守千秋垂脚  
襄陽諸嶺以拒宣常諸州險要金人去楊州辛未詔  
御營使司唯掌行在五軍凡邊防經制並歸三省樞  
密金人過高郵軍守臣趙士瑗棄城走潰兵宋進犯  
泰州守臣曾班遁壬申罷軍期司掎歛民財者呂頤

浩遣將陳彥渡江襲金餘兵復楊州癸酉斬蹇犯通  
州韓世忠小校李在叛據高郵甲戌黃潛善汪伯彥  
並落職乙亥召朱勝非赴行在留張浚駐平江贈陳  
東歐陽澈承事郎官有服親一人恤其家召馬伸赴  
行在卒贈直龍圖閣丙子詔士民直言時政得失是  
月以王庶爲陝西節制使知京兆府節制司都統制  
曲端爲鄜延經畧使知延安府張用據確山號張莽  
蕩三月己卯朔日中有黑子庚辰以朱勝非爲尚書  
右僕射兼中書侍郎辛巳葉夢得罷以盧益爲尚書  
左丞未拜復罷爲資政殿學士御營都統制王淵同

簽書樞密院事呂頤浩爲江南東路安撫制置使知江寧府壬午詔王淵免進呈書押本院文字扈從統制苗傳忬王淵驟得君劉正彥忬招降劇盜而賞薄帝在揚州闔宦用事恣橫諸將多疾之癸未傳正彥等叛勒兵向闕殺王淵及內侍康履以下百餘人帝登樓以傳爲慶遠軍承宣使御營使司都統制正彥渭州觀察使副都統制傳等迫帝遜位于皇子魏國公請隆祐太后垂簾同聽政是夕帝移御顯寧寺甲申尊帝爲睿聖仁孝皇帝以顯寧寺爲睿聖宮大赦以張洎兼中書侍郎韓世忠爲御營使司提舉一行

事務前軍統制張俊爲秦鳳副總管分其衆隸諸軍  
丁亥以東京留守杜充爲資政殿大學士節制京東  
西路殿前副都指揮使東京副留守郭仲荀進昭化  
軍節度使分窠內侍監珪高勲張去爲張旦曾擇陳  
永錫于嶺南諸州擇已行傳追還殺之呂頤浩至江  
寧戊子以端明殿學士王孝迪爲中書侍郎盧益爲  
尚書左丞張俊部衆八千至平江張浚諭以決策起  
兵問罪約呂頤浩劉光世招韓世忠來會己丑改元  
明受張浚奏乞睿聖皇帝親總要務庚寅百官始朝  
睿聖宮以苗傅爲武當軍節度使劉正彥爲武成軍

節度使劉光世爲太尉淮南制置使范瓊爲慶遠軍  
節度湖北制置使楊惟忠加少保張浚爲禮部尚書  
及呂頤浩並赴行在傅等以御營中軍統制吳湛主  
管步軍司黃潛善汪伯彥並分司衡永州居住王孝  
迪廬益爲大金國信使進士黃太本吳時敏爲先期  
告請使置行在都茶場呂頤浩奏請睿聖皇帝復大  
位金人陷鄜州癸巳張浚命節制司參議官辛道宗  
措置海舶遣布衣馮輜持書說傅正彥甲午有司請  
尊太后爲太皇太后不許呂頤浩率勤王兵萬人發  
江寧乙未再貶黃潛善鎮東軍節度副使英州安置

劉光世部兵會呂頤浩于丹陽丙申韓世忠自鹽城收散卒至平江張俊假兵二千戍戍赴行在辛丑傳等以世忠爲定國軍節度使張俊爲武寧軍節度使知鳳翔府張浚責黃州團練副使郴州安置俊等皆不受傳等遣軍駐臨平拒勤王兵壬寅日中黑子沒廬蓋罷呂頤浩至平江水賊邵青入泗州癸卯太后詔睿聖皇帝宜稱皇太弟天下兵馬大元帥康王皇帝稱皇太姪監國賜傳正彥鐵券呂頤浩張浚傳檄中外討傳正彥執黃大本下獄乙巳太后降旨睿聖皇帝處分兵馬重事張俊率兵發平江劉光世繼之

丙午張浚同知樞密院事翰林學士李邴御史中丞  
鄭穀並同簽書樞密院事呂頤浩張浚發平江丁未  
次吳江奏乞建炎皇帝還即尊位朱勝非召傅正彥  
至都堂議復辟傅等遂朝睿聖宮金人陷京東諸郡  
劉洪道棄青州去撻懶以劉豫知東平府節制河南  
州郡趙立復徐州夏四月戊申朔太后下詔還政皇  
帝復大位帝還宮與太后御前殿垂簾詔尊太后爲  
隆祐皇太后己酉詔訪求太祖神主以苗傅爲淮西  
制置使劉正彥副之庚戌復紀年建炎命張浚知樞  
密院事苗傅劉正彥並檢校少保呂頤浩張浚軍次

臨平苗翊馬柔吉拒戰不勝傅正彥引兵二千夜遁  
辛亥皇太后撤簾呂頤浩等入見傅犯富陽新城二  
縣遣統制王德喬仲福追擊之癸未朱勝非顏岐王  
孝迪張浚路允迪俱罷以呂頤浩爲尚書右僕射兼  
中書侍郎李昉尚書右丞鄭穀簽書樞密院事甲寅  
以劉光世爲太尉御營副使韓世忠爲武勝軍節度  
使御前左軍都統制張俊爲鎮西軍節度使御前右  
軍都統制勤王所僚屬將佐進官有差主管殿前司  
王元左言並責官英賀州安置樞密都承旨馬瑗停  
官永州居住吏部員外郎范仲熊浙西安撫司主管



機宜文字時希孟並除名柳州吉陽軍編管斬中軍  
統制吳湛工部侍郎王世修于市贈王淵開府儀同  
三司乙卯大赦舉行仁宗法度應嘉祐條制與今不  
同者自官制役法外賞格從重條約從寬罷上供不  
急之物元祐石刻黨人官職恩數追復未盡者令其  
家自陳許中外直言丁巳禁內侍交通主兵官及饋  
遺假貸借役禁兵干預朝政庚申詔尚書左右僕射  
並帶同中書門下平章事改門下中書侍郎爲參知  
政事省尚書左右丞以李昉參知政事詔行在職事  
官各舉所知併省館學寺監等官苗傅犯衢州癸亥

以給事中周望爲江浙制置使丁卯帝發杭州留鄭  
穀衛皇太后以韓世忠爲江浙制置使及劉光世追  
討傅正彥已巳詔傅正彥苗瑒苗翊張達不赦餘黨  
並原壬申立子魏國公塽爲皇太子赦傅黨王鈞甫  
馬柔吉罪許其自歸丙子范瓊自光蘄引兵屯洪州  
是月劉文舜寇濠州西北賊薛慶襲據高郵軍五月  
戊寅朔帝次常州以張浚爲宣撫處置使以川陝京  
西湖南北路隸之聽便宜黜陟庚辰苗傳統領官張  
翼斬王鈞甫馬柔吉降辛巳次鎮江府遣祭張慙陳  
東墓詔恤其家癸未以翰林學士滕康同簽書樞密

院事乙酉至江寧府駐蹕神霄宮改府名建康起復  
朝散郎洪皓爲大金通問使丁亥以徽猷閣直學士  
陳彥文提領水軍措置江浙防托召藍珪等速還朝  
己丑韓世忠追討傅正彥于浦城縣獲正彥傅遁走  
張浚撫諭薛慶于高郵爲慶所留乙未浚罷以御營  
前軍統制王玘爲淮南招撫使己亥復置中書門下  
省檢正官省左右司郎中二員苗傅裨將江池殺苗  
翊降于周望傅走建陽縣土豪唐標執之以獻辛丑  
張浚還自高郵復命知樞密院事是月翟興擊殺楊  
進餘黨復推其徒劉可拒官軍六月戊申朔以東京

留守杜充引兵赴行在命兼宣撫處置副使節制淮  
南京東西路已酉以久雨召郎官已上言闕政呂頤  
浩請令實封以聞遂用司勳員外郎趙鼎言罷王安  
石配享神宗廟庭以司馬光配王善攻淮寧府不克  
轉寇宿州統領王冠戰敗之甲寅罷賞功司乙卯命  
恤死事者家且錄其後升浙西安撫使康允之爲制  
置使丙辰劉光世招安苗傅將韓侂戊午命江浙淮  
南引塘灤開畝澮以阻金兵庚申皇太后至建康府  
辛酉以久陰下詔以四失罪已一曰昧經邦之大略  
二曰昧戡難之遠圖三曰無綏人之德四曰失馭臣

之柄仍榜朝堂徧諭天下使知朕悔過之意以帶御  
器械李質權同主管殿前司乙丑以建康府路安撫  
使連南天兼建康府宣徽太平等州制置使丁卯右  
司諫袁植請誅黃潛善及失守者權邦彥等九人詔朕  
方念咎責已豈可盡以過失歸於臣下遂罷植知池  
州以趙鼎爲右司諫癸酉置樞密院檢詳官以右司  
郎中劉寧止爲沿江措置副使甲戌移御行宮乙亥  
詔諭中外以迫近防秋請太后率宗室迎奉神主如  
江表百司庶府非軍旅之事者並令從行朕與輔臣  
宿將備禦寇敵應接中原官吏士民家屬南去者有

司毋禁金人陷磁州是夜賊貴仲正降秋七月戊寅  
贈王復爲資政殿學士己卯親憲囚辛巳苗傅劉正  
彥伏誅癸未進韓世忠檢校少保武勝昭慶軍節度  
使御營使司都統制范瓊自洪州入朝以瓊爲御營  
使司提舉一行事務後軍統制辛企宗爲都統制命  
學士院草夏國書大金國表本付張浚甲申詔以苗  
劉之變當軸大臣不能身衛社稷朱勝非顏岐路允  
迪並落職張浚衡州居住以知廬州胡舜陟爲淮西  
制置使知江州權邦彥兼本路制置使金人犯山東  
安撫使劉洪道棄濰州遁萊州守將張成舉城降丁

亥以范瓊跋扈無狀收下大理獄分其兵隸神武五  
軍皇太子薨謚元懿戊子鄭穀薨己丑以資政殿大  
學士王綯參知政事兵部尚書周望同簽書樞密院  
事庚寅仙井監鄉貢進士李時雨上書乞選立宗子  
係屬人心帝怒斥還鄉里辛卯升杭州爲臨安府壬  
辰言者又論范瓊逼遷徽宗及迎立張邦昌瓊辭伏  
賜死子弟皆流嶺南劉洪道復青州執金守向大猷  
乙未遣謝亮使夏國丁酉遣崔縱使金軍前庚子張  
浚發行在辛丑王瓌與靳賽遇合戰敗績壬寅命李  
邠滕康權知三省樞密院事扈從太后如洪州楊惟

忠將兵萬人以衛以杜充同知樞密院事兼宣撫處  
置副使乙巳詔江西閩廣荆湖諸路團教峒丁槍杖  
手山東賊郭仲威陷淮陽軍翟興引兵入汝州與賊  
王俊戰敗之八月己酉移浙西安撫司于鎮江府庚  
戌李昫罷壬子以吏部尚書劉珪爲端明殿學士權  
同知三省樞密院事甲寅王庶罷以徽猷閣直學士  
知慶陽府王似爲陝西節制劉文舜入舒州己未太  
后發建康丁卯遣杜時亮使金軍前閏八月丁丑朔  
以胡舜陟爲沿江都制置使集英殿脩撰王義叔副  
之丁亥輔達掠漣水軍殺軍使郝璘率衆降于王瓌



己丑以呂頤浩守尚書左僕射杜充守右僕射並同中書門下平章事庚寅起居郎胡寅上書言二十事呂頤浩不悅罷之辛卯命杜充兼江淮宣撫使守建康前軍統制王瓌隸之韓世忠爲浙西制置使守鎮江劉光世爲江東宣撫使守太平池州並受充節制丁酉太后至洪州己亥減福建廣南歲上供銀三之一詔制置使唯用兵聽便宜餘事悉禁壬寅帝發建康復還浙西張俊卒企宗以其軍從甲辰次鎮江府賜陳東家金張浚次襄陽招官軍義兵分屯襄郢唐鄧以程千秋李允文節制是月知濟南府宮儀及金

人數戰于密州兵潰儀及劉洪道俱奔淮南守將李  
逵以密州降金靳賽詣劉光世降九月丙午朔日有  
食之謀報金人治舟師將由海道窺江浙遣韓世忠  
控守圖山福山辛亥次平江府壬子金人陷單州興  
仁府遂陷南京執守臣凌唐佐降之癸丑以周望爲  
兩浙荊湖等路宣撫使總兵守平江翰林學士張守  
同簽書樞密院事命劉光世移屯江州丙辰遣張邵  
等充金國軍前通問使金人陷沂州却高麗入貢使  
張浚承制罷知潭州辛炳起復直龍圖閣向子諲代  
之丁巳蠲諸路青苗積欠錢辛酉知鼎州邢侗坐結

耶律余覲再責汝州團練副使英州安置癸亥賜宿  
泗州都大提舉使李成軍綃二萬匹成尋復叛己巳  
以胡舜陟爲宣撫司參謀官知鎮江府陳邦光爲沿  
江都制置使庚午以工部侍郎湯東野知平江府兼  
浙西制置使辛未追復鄒浩龍圖閣待制壬申夜潭  
州禁卒作亂謀竄不果向子諲隨招安之甲戌金帥  
婁宿犯長安經略使郭琰棄城遁河北賊酈瓊圍光  
州冬十月丙子朔詔按察官歲上所發擿賊吏姓名  
以爲殿最庚辰禁諸軍擅入川陝癸未帝至杭州復  
如浙東庚寅渡浙江郭仲威詣周望降望以仲威爲

本司統制辛卯李成陷滁州殺守臣向子伋壬辰帝  
至越州癸巳命提舉廣西峒丁李械市馬邕州置牧  
養務戊戌初命東南八路歲收經制五項錢輸行在  
張浚治兵于興元府金人陷壽春府庾子陷黃州守  
臣趙令歲死之辛丑張浚以同主管川峽茶馬趙開  
爲隨軍轉運使專總四川財賦金人自黃州濟江劉  
光世引軍遁知江州韓紹棄城去金人自大冶縣趨  
洪州是月京西賊劉滿陷信陽軍殺守臣趙士負盜  
入宿州殺通判盛脩己十一月乙巳朔金人犯廬州  
守臣李會以城降王善叛降金金人執之丁未詔降

雜犯死罪釋流以下囚聽李綱自便追復宋齊愈官  
貴仲正犯荆南兵馬鈐轄渠成與戰斬之戊申金帥  
兀术犯和州守臣李儔以城降通判唐璟死之己酉  
張浚出行關陝兀术陷無爲軍守臣李知幾棄城走  
壬子太后退保虔州江西制置使王子獻棄洪州走  
丁巳金人陷臨江軍守臣吳將之遁戊午遣孫悟等  
充金國軍前致書使金人陷洪州權知州事李積中  
以城降撫衷二州守臣王仲山王仲疑皆降淮賊劉  
忠犯蘄州韓世清逆戰破之忠入舒州殺通判孫知  
微庚申金人陷真州守臣向子志棄城去辛酉太后

至吉州壬戌金人犯建康府陷溧水縣尉潘振死之  
癸亥金人陷太平州主管步軍司閻勅自西京奉累  
朝御容至行在詔奉安于天慶觀尋命勅節制淮西  
軍馬以拒金人甲子杜充遣都統制陳淬岳飛等及  
金人戰于馬家渡王瓌以軍先遁淬敗績死之乙丑  
以檢正諸房公事傅崧卿爲浙東防遏使太后發吉  
州次太和縣護衛統制杜彥及後軍楊世雄率衆叛  
犯永豐縣知縣事趙訓之死之金人至太和縣太后  
自萬安陸行如虔州丁卯下詔回浙西迎敵金人犯  
吉州守臣楊淵棄城走又陷六安軍己巳帝發越州

次錢清鎮庚午復還越州以周望同知樞密院事仍  
兼兩浙宣撫使守平江殿前都指揮使郭仲荀爲副  
使守越州右軍都統制張俊爲浙東制置使從行御  
史中丞范宗尹參知政事辛未元朮入建康府守臣  
陳邦光戶部尚書李榕迎拜通判楊邦乂拒之癸酉  
帝如明州金人犯建昌軍兵馬監押蔡延世擊却之  
甲戌元朮殺楊邦乂韓世忠自鎮江引兵之江陰軍  
江淮宣撫司潰卒李選攻陷鎮江淮西兵馬都監王  
宗望以濠州降于金是月張浚至秦州桑仲自唐州  
犯襄陽京西制置使程千秋敗走仲遂據襄陽十二

月乙亥朔張浚承制廢積石軍丙子帝至明州丁丑  
江淮宣撫司準備將戚方擁衆叛犯鎮江府殺守臣  
胡唐老辛巳金人陷常州守臣周杞遣赤心隊官劉  
晏擊走之陷廣德軍殺守臣周烈劉光世引兵趨南  
康軍壬午定議航海避兵禁卒張寶等憚行謀亂命  
呂頤浩等伏兵執寶等十七人斬之甲申張浚承制  
拜涇原經略使曲端爲威武大將軍宣撫處置使司  
都統制乙酉兀朮犯臨安府守臣康允之棄城走錢  
塘縣令朱蹕死之己丑帝乘樓船次定海縣給行在  
諸軍雪寒錢辛卯留范宗尹趙鼎于明州以候金使



癸巳帝次昌國縣乙未杜彥犯潭州殺通判孟彥卿  
趙民彥金人屠洪州戊戌金人犯越州安撫使李鄴  
以城降衛士唐琦袖巨石要擊金帥韃八不克死之  
郭仲荀棄軍奔温州庚子移幸温台癸卯黃潛善卒  
于英州李成自滁州引兵之淮西

本紀卷第二十五

本紀卷第二十六

宋史二十六

開府儀同三司上柱國錄軍國重事前行書右丞相樞密使領經筵事都總裁脫脫等奉勅修

高宗三

四年春正月甲辰朔御舟碇海中乙巳金人犯明州  
張俊及守臣劉洪道擊却之丙午帝次台州章安鎮  
己酉遣小校自海道如處州問安太后庚戌金人再  
犯明州張俊引兵去浙東副總管張思政及劉洪道  
繼遁癸丑貶郭仲荀汝州團練副使廣州安置丙辰  
詔原兩浙州郡降金官吏丁巳婁宿陷陝州守臣李

彥仙死之己未金人陷明州夜大雨震電乘勝破定  
海以舟師來襲御舟張公裕以大船擊退之辛酉發  
章安鎮壬戌雷雨又作甲子泊温州港口乙丑以中  
書舍人李正民為兩浙湖南江西撫諭使詣太后問  
安丁卯台州守臣晁公為棄城遁處州衛兵及鄉兵  
相殺縱火肆掠三日劉可轉寇京西屢為桑仲所敗  
至是為其黨所殺復推劉超據荆門軍戊辰滕康劉  
珪罷仍奪職己巳換給僧道度牒人輸錢十千辛未  
命臣僚條具兵退之後措置之策駐蹕之所是月金  
人攻楚州守臣趙立拒之金人犯邠州曲端遣涇原

路副總管吳玠拒戰敗之于彭原又陷同州張浚遣謝亮使夏國至則其主乾順已稱制遂還二月甲戌朔鄺瓊率衆降于劉光世叛將傳選詣處州乞降乙亥奉安祖宗神御于福州詔復以盧益為資政殿學士李回端明殿學士並權知三省樞密院事金人陷潭州將吏王暕劉玠趙聿之戰死向子諲率兵奪門亡去金兵大掠屠其城丙子金人自明州引兵還臨安癸未虔州鄉兵首領陳新率衆數萬圍城叛將胡友亦犯虔州與新戰破之新乃去甲申禁迓卒投刺別軍丙戌金人自臨安退兵命劉光世率兵追之丁

亥金人陷汴京權留守上官悟出奔為盜所殺庚寅  
帝次溫州浙東防遏使傅崧卿入越州辛卯金人陷  
秀州甲午知蔡州程昌寓棄城南歸鼎州民鍾相作  
亂自稱楚王乙未杜充罷丙申以金兵退肆赦張浚  
承制以陝西制置使王似知成都府罷諸路武臣提  
點刑獄李成入舒州金游騎至平江周望奔太湖守  
臣湯東野亦遁茶陵縣軍賊二千餘人犯郴州永興  
縣戊戌金人入平江縱兵焚掠辛丑白虹貫日鍾相  
陷澧州殺守臣黃宗權湖北制置使傅雱招諭孔彥  
舟彥舟聽命因以為湖南北提殺使荆南守臣唐慤

棄城去金人陷醴州守臣王淑棄城去是月張浚自秦州引兵入援三月癸卯朔孔彥舟入鼎州金人去平江統制陳思恭以舟師邀敗其後軍于太湖呂頤浩請幸浙西丙午趙鼎言金兵去未遠遂緩其行丁未命發運司說諭兩浙富民助米以備巡幸辛亥遣兵部員外郎馮康國等撫諭荆湖南北廣南諸路壬子金人入常州守臣周杞棄城去甲寅遣盧益及御營都統制辛企宗奉迎太后東還丙辰金人犯終南縣經略使鄭思戰敗死之丁巳金人至鎮江府韓世忠屯焦山寺邀擊之詔侍從官各舉可充監司者一

二人辛酉御舟發温州宣撫司節制軍馬季文部  
兵至鄂州御營前軍將楊勅叛甲子張浚請便宜辟  
官不許衝改戊辰孔彥舟擊敗鍾相禽相及其子子  
昂檻送行在己巳戚方陷廣德軍殺權通判王儔夏  
四月癸酉蠲江西州縣兵盜殘破民家夏稅戊寅吳  
玠及金人戰于邠州彭原店敗績部將楊晟死之己  
卯以觀文殿學士朱勝非為江西湖南北宣撫使是  
日張浚引兵至房州知金兵退乃還癸未帝駐越州  
甲申下詔親征巡幸浙西韓世忠駐軍揚子江要金  
人歸路屢敗之元朮引軍走建康乙酉以御史中丞

趙鼎為翰林學士鼎固辭不拜戚方圍宣州劉光世  
遣統制王德誘誅劉文舜于饒州丙申用趙鼎劾奏  
呂頤浩罷為鎮南軍節度使醴泉觀使命三省樞密  
院同班奏事韓世忠及兀朮再戰江中金人乘風縱  
火世忠敗績兀朮渡江屯六合縣丁酉復以趙鼎為  
御史中丞戊戌振明州被兵民家已亥以張浚為浙  
西江東制置使辛丑王德破妖賊王宗石于信州貴  
溪縣執其渠帥諸縣悉平是月金人犯江西者自荆  
門軍北歸留守司同統制牛皐潛軍寶豐擊敗之五  
月甲辰以范宗尹為尚書右僕射兼御營使辛亥統



領赤心隊軍馬劉晏及戚方戰于宣州敗死壬子金人焚建康府執李枕陳邦光而去淮南宣撫司統制岳飛邀擊于靜安鎮敗之是夜紫微垣內有赤雲亘天白氣貫其中癸丑詔臺諫等官各舉所知二人以張守參知政事趙鼎僉書樞密院事以白金三萬兩賜韓世忠軍贈戰歿將孫世詢嚴永吉張淵等官甲寅金人陷定遠縣執間勅去勅不屈死之巨師古擊戚方于宣州數敗之方引去乙卯王綯罷丁巳命劉光世移軍捕戚方楊勅犯婺州戊午復置權尚書六部侍郎癸亥詔中原淮南流寓士人聽所在州郡附

試甲子周望罷尋分司衡州居住置京畿淮南湖北  
京東西路鎮撫使乙丑升高郵軍為承州以翟興孟  
汝趙立劉位趙霖李成吳翊李彥先薛慶並為鎮撫  
使興河南府汝唐州立楚泗州漣水軍位滁濠州霖  
和州無為軍成舒蘄翊光黃州彥先海州淮陽軍慶  
承州天長軍丁卯慶及金人戰于承州城下累敗之  
戊辰命江浙州縣祭戰死兵民分江東西為鄂州江  
州池州三路置安撫使罷諸路帥臣無制置使諸州  
守臣兼管內安撫使是月劉超據荆南分兵犯峽州  
又合叛將彭筠犯復州淮西敗將崔增陷焦湖水砦

河東北經制使王俊舉兵及金人戰于襄城縣敗之  
復領昌府張浚承制以金房州隸利路六月辛未朔  
蠲紹興府三縣湖田米詔侍從臺諫諸將集議駐蹕  
事宜楊勅犯虔州癸酉遣統制陳思恭討勅合江南  
兩路轉運為都轉運使再貶周望昭化軍節度副使  
連州安置甲戌罷御營司以范宗尹兼知樞密院事  
乙亥王璣遣統領林閏等追襲楊動于東陽縣軍敗  
裨將李在死之丁丑以劉光世部兵為御前巡衛軍  
光世為都統制楊動等焚建州戚方犯湖州安吉縣  
詔張俊捕之戊寅更御前五軍為神武軍御營五軍

為神武副軍以知建康府權邦彥為淮南等路制置  
發運使除濠鎮撫使劉位為賊張文孝所殺命其子  
綱襲職庚辰置鎮撫使六人陳規德安府復州漢陽  
軍解潛荊南府歸陝州荊門公安軍程昌寓鼎澧州  
陳求道襄陽府鄧隨郢州范之才金筠房州馮長寧  
淮寧順昌府蔡州辛巳慮囚申命有司討論釐正崇  
寧以來濫賞罷諸州添差通判職官癸未召劉光世  
赴行在甲申岳飛破戚方于廣德軍乙酉鍾相偽將  
胡源引兵入慈利縣執其黨陳誠來降丙戌以呂頤  
浩為建康路安撫大使劉光世為兩浙路安撫大使

朱勝非為江州路安撫大使郭仲威為真楊州鎮撫使戚方詣張俊降庚寅召韓世忠率兵赴行在辛卯妖賊王宗石等伏誅壬辰權密州都巡檢徐文率部兵泛海來歸甲午置樞密院幹辦官四員乙未郭仲威犯鎮江府遣岳飛擊之是月兀朮聞張浚在秦州將舉兵北伐自六合引兵趨陝西秋七月癸卯劉光世援宣撫使例乞便宜行事不許詔軍興以來諸州得便宜指揮者並罷乙巳馮長寧復順昌府張浚罷曲端都統制丁未以劉光世為集慶軍節度使開府儀同三司戊申以孔彥舟為辰沅靖州鎮撫使張浚

獻黃金萬兩助軍用宣撫司遣統制官呂世存王俊復鄜州其餘州縣多迎降後軍將王闢叛陷歸州鈐轄田祐恭擊敗之己酉王闢犯房州守臣韋知幾棄城走庚戌楊勅受劉光世招安尋復叛去迫泉州癸丑崔增犯太平州守臣郭偉拒却之乙卯金人徙二帝自韓州之五國城劉光世乞移司平江不許丙辰張俊合諸將戚方等兵萬餘赴行在丁巳申命元祐黨人子孫于州郡自陳盡還當得恩數韓世忠張俊並罷己未禁閩廣淮浙海舶商販山東慮為金人鄉導詔江浙福建州縣諭豪右募民兵據險立柵防遏

外寇庚申以岳飛為通泰州鎮撫使辛酉建州民范  
汝為作亂命統制李捧捕之乙丑復李邦彥以下十  
九人官職聽自便復李綱銀青光祿大夫許翰顏岐  
端明殿學士張浚貶曲端階州居住丁卯金人立劉  
豫為帝國號齊戊辰罷提領措置茶鹽司己巳詔王  
瓚部兵屯信州程昌寓遣將杜湛禽李合戎于松滋  
縣是月張用據漢陽軍沿江措置副使李允文招降  
之以便宜徙鄂州路副總管以右軍統制馬友知漢  
陽軍八月辛未朔以禮部尚書謝克家參知政事壬  
申李成請降于江州詔撫納之張浚傳程千秋官文

州編管癸酉選神武中軍親兵六百人番直禁中甲  
戌詔侍從官日一員輪直進故事關治體者丁丑以  
韓世忠為檢校少師武成感德軍節度使張俊檢校  
少保寧武昭慶軍節度使贈監察御史常安民為左  
司諫江公望左諫議大夫錄其後二人庚辰太后至  
自虔州薛慶及金人戰于揚州城下死之郭仲威奔  
興化縣辛巳侍御史沈與求戶部侍郎季陵以論宰  
相范宗尹皆黜宗尹復視事癸未盧益罷張浚復永  
興軍再貶由端海州團練使萬州安置甲申陳萬信  
餘黨雷進作亂乙酉焚慈利石門二縣以御營司叅



議官王擇仁權河東制置使山砦首領韋忠佺為都  
統制宋用臣馮賽同都統制丙戌命李成吳翊捍禦  
上流翊棄城去以成為四州鎮撫使命李捧便道過  
信州招捕靳賽戊子以饒信妖賊平赦二州徒以下  
囚蠲民今年役錢貶滕康永州劉珏衡州並居住己  
丑詔岳飛救楚州仍命劉光世遣兵往援辛卯杜湛  
渡江討羣賊復石首等五縣壬辰盜入梅州殺守臣  
沈同之大掠而去癸巳命福建安撫使程邁會兵討  
范汝為甲午知虢州邵興遣統制閻興及金人戰于  
解州東屢破之金人陷承州命陳思恭屯兵明州以

防海道劉光世遣王德輿瓊以輕兵渡江乙未遇金  
游騎于召伯埭敗之戊戌以桑仲為襄陽鄧隨郢州  
鎮撫使是月罷提舉廣西峒丁孔彥舟入潭州宣撫  
司叅議官王以寧率兵拒之以寧敗遁去宣撫司主  
管機宜文字傅雱在彥舟軍中承制以彥舟權湖南  
副總管劉綱以乏食率兵奔溧陽九月辛丑呂頤浩  
入見請益兵命王瓌巨師古顏孝恭兵隸之分屯境  
內壬寅詔諸路決囚甲辰徽宗皇后鄭氏崩于五國  
城戊申命秦鳳將關師古領兵赴行在劉豫僭位于  
北京庚戌禁宣撫司僚屬便宜行事及京西湖南北

路勿隸川陝宣撫司節制癸丑涇原同統制李彥琦  
及金人戰于洛河車渡敗之乙卯罷中書門下省檢  
正官桑仲陷均房州進犯白土關丙辰復增左右司  
郎官為四員金人攻楚州趙立死之丁巳趙霖復和  
州李成遣馬進犯興國軍戊午荆襄賊趙延壽犯德  
安府陳規拒却之己未金均房安撫使王彥及桑仲  
戰于平麗縣敗之王闢詣彥降辛酉李捧擊范汝為  
于建州官軍皆潰捧遁去金人犯揚州統制靳賽逆  
戰于港河敗之金人陷延安府執呂世存又陷保安  
軍癸亥張浚遣都統制劉錫統五路兵及金將婁宿

戰于富平縣浚駐邠州督戰官軍敗績丙寅給劉光  
世犒軍銀二萬兩絹二萬匹戊辰趙延壽焚郢州金  
人陷楚州鎮撫使李彥先來救兵敗死之冬十月庚  
午朔張浚斬環慶經略使趙哲于邠州貶劉錫合州  
安置命諸將各領兵歸本路浚退保秦州陝西大震  
辛未秦檜自楚州金將撻懶軍中歸于漣水軍丁禩  
水砦壬申命楊惟忠王玘討李成丙子以孔彥舟為  
鼎澧辰沅靖州鎮撫使戊寅鍾相餘黨楊華舉兵圍  
桃源縣己卯馬進犯江州癸未程昌寓入鼎州擊楊  
華破之甲申趣劉光世救楚州丁亥以李回同知樞

密院事庚寅遣前御史臺檢法官謝嚮招范汝為召  
張浚以兵入援追復李邦彥觀文殿大學士辛卯虔  
州賊李敦仁及弟世雄舉兵破虔州石城縣甲午命  
楊惟忠率兵屯江州乙未岳飛破金人于承州丙申  
詔劉光世節制諸鎮守禦通泰州伺便襲金人過淮  
是月馮長寧棄城去尋以淮寧附劉豫江東賊張琪  
犯建康府劉洪道招降之環慶路統制慕洧叛附于  
夏國涇原統制張中彥經略司幹辦趙彬叛降金人  
劉忠據岳州平江縣白面山王善餘黨祝友擁衆為  
亂屯滁州龔家城十一月癸卯慕洧遂引金人圍環

州呂頤浩復南康軍甲辰趙鼎罷乙巳秦檜入見丙午岳飛棄泰州渡江丁未金人犯泰州飛退保江陰軍沙上以御史中丞富直柔僉書樞密院事秦檜為禮部尚書李允文殺岳州守臣袁植呂頤浩會楊惟忠與馬進戰南康軍不利戊申頤浩遣巨師古救江州為進所敗師古奔洪州金人陷涇原經略使劉錡退屯瓦亭己酉以孔彥舟為湖南副總管部兵屯潭州庚戌命神武副軍都統制辛企宗討范汝為壬子日南至率百官遙拜二帝乙卯改樞密院幹辦官為計議官丙辰金人陷泰州丁巳通州守臣呂伸棄城

去王彥攻桑仲于黃水破之房州平張浚以彥為金均房州鎮撫使崔增犯池州劉洪道遣統制李貴擊走之增以兵萬餘詣呂頤浩降甲子詔諸路守臣節制管內軍馬丙寅金房州賊郭希犯歸州田祐恭擊卻之命王玘部兵萬人速援呂頤浩祝友渡江大掠是月張浚退軍興州秦鳳副總管吳玠收餘兵保大散關東和尚原詔諸路轉運司括借寺觀田租蘆場三年十二月庚午安南請入貢卻之辛未遣度支員外郎韓球括饒信諸州錢糧凡江湖川廣上供皆拘之壬申命孔彥舟援江州丙子禁節制軍馬守臣便

宜行事丁丑馬進分兵犯洪州乙丑李敦仁犯撫州  
崇仁縣命李山張中彥討之壬辰金人犯熙州總管  
劉惟輔戰敗之殺五千餘人甲午再犯熙州惟輔軍  
潰被執死之乙未以張俊為江南招討使討李成丁  
酉范汝為降詔補民兵統領是月張俊承制復海州  
團練副使曲端左武大夫興州居住是歲宣撫處置  
司始令四川民歲輸激賞絹三十三萬匹有奇

紹興元年春正月己亥朔帝在越州帥百官遙拜二  
帝不受朝賀下詔改元釋流以下囚復賢良方正直  
言極諫科蠲兩浙夏稅和買紬絹絲綿減閩中上供



銀三分之一戊申改命張俊為江淮路招討使復江  
池路為江東西路分荆湖江南諸州為荆湖東西路  
置安撫司治池江鄂鼎州江南東西路各置轉運司  
荆湖東西路轉運司通掌兩路財賦以呂頤浩為江  
東路安撫大使朱勝非江西路安撫大使馬進陷江  
州守臣姚舜明棄城走端明殿學士王易簡等二百  
人皆遇害己酉岳飛引兵之洪州金人犯揚州謝嚮  
率范汝為討平建陽賊劉時舉金人犯秦州吳玠擊  
敗之庚戌又犯西寧州守臣俱重迎降辛亥謝克家  
罷壬子詔京官知縣並堂除內外侍從各舉可任縣

令者二人犯贓連坐自今不歷縣令者勿除監司郎  
官不歷外任者勿除侍從著為令張中孚以原州叛  
降于金癸丑李敦仁圍建昌軍蔡延世率鄉兵擊退  
之賊曹成入漢陽軍李允文招之成入鄂州復趨江  
西丁巳呂頤浩遣王玘崔增擊賊于湖口大敗之頤  
浩及楊惟忠引兵趨江州辛酉詔太祖創業垂統德  
被萬世神宗詔封子孫一人為安定郡王世世勿絕  
自宣和末至今未舉有司其上應襲封人名依故事  
舉行金人再圍環州是月張浚復曲端榮州刺史提  
舉江州太平觀閬州居住尋移恭州二月戊辰朔宜

章縣民李冬至二作亂犯英連詔郴諸州祝友降劉  
光世分其軍以友知楚州庚午改行宮禁衛所為行  
在皇城司李成黨邵友犯筠州守臣王庭秀棄城去  
辛未犯臨江軍守臣康倬遁壬申初定歲祀天地社  
稷如奏告之禮癸酉桑仲自棗陽引兵還襄陽丁丑  
鄜延將李永琦叛犯慶陽府戊寅禁州郡統兵官擅  
招安亂軍盜賊己卯日中有黑子四日乃沒以辛企  
宗為福建制置使辛巳以秦檜叅知政事壬午水賊  
張榮入通州癸未詔辛企宗及謝嚮罷遣范汝為兵  
汝為不聽命甲申詔王玘張俊倚角討捕馬進等賊

丙戌復置秘書省己丑命孔彥舟呂頤浩張俊會兵  
討李成壬辰兩電癸巳邵青寇宣州丙申詔諸路提  
刑司以八月類省試張浚亦以便宜合川陝舉人即  
置司類省試丁酉宣教郎范燾坐誣訟孟忠厚且及  
太后除名潮州編管是月李敦仁犯汀州馬友遣其  
黨犯鄂州總管張用拒卻之李允文以友權湖南招  
捉公事友大掠漢陽而去過岳州守臣吳錫道友據  
之三月戊戌朔以嚴衢二州守臣柳約李處勸有治  
効各進職一等呂頤浩遣崔增王玘合兵擊李成于  
湖口大敗之庚子張浚以富平之敗上疏待罪詔免

壬寅禁諸路遏糴丙午張俊楊沂中岳飛渡江擊馬  
進大敗之孔彥舟焚掠潭州趨衡州己酉李成犯饒  
州庚戌張俊楊沂中復擊馬進于筠河敗之復筠州  
進奔江州男子崔紹祖詐稱越王中子受上皇詔為  
天下兵馬大元帥趙霖以聞辛亥詔赴行在命劉光  
世兼淮南京東路宣撫使治揚州經畫屯田光世迄  
不行甲寅罷諸州免行錢乙卯金人破階州庚申劉  
超犯澧州統制杜湛率兵拒之甲子始下詔罪李成  
募人禽斬赦脅從者張俊追馬進至江州進戰敗遁  
去乙丑進復江州楊沂中趙密引兵追擊進又大敗

之成奔蘄州振淮南京東西流民荆湖東路安撫使  
向子諲說降馬友與共討李冬至三平之是月金人  
攻張榮縮頭湖水砦榮擊敗之來告捷劉光世以榮  
知泰州金人迫興州張浚退保閬州以端明殿學士  
張深為四川制置使及叅議軍事劉子羽趨益昌叅  
謀官王庶為龍圖閣待制知興元府兼利夔兩路制  
置使節制陝西諸路桑仲以其黨李道知隨州夏四  
月己巳張浚承制分利閬劔文政五州為利州路置  
經略安撫使庚午張琪復叛犯當塗縣金將撻懶渡  
淮屯宿遷縣馬樂湖壬申太白晝見乙亥劉光世復

楚州階州統領杜肇復階州馬友引兵入潭州戊寅  
杜琪棄澧州劉超入據之己卯金沅原帥趙彬犯耀  
州守臣趙澄擊走之淮賊寇宏犯濠州庚辰隆祐皇  
太后崩癸未桑仲陷鄧州守將譚究棄城走河東招  
捉使王俊引兵來援仲執斬之以其黨李橫知州事  
乙酉為太后制替年服辛卯羣臣三上表始聽政癸  
巳命向子諲發兵及廣西安撫許中同拒險要防孔  
彥舟入廣仍許脅從自新以招諭之是月京西賊李  
忠陷商州守臣楊伯孫棄城走呂頤浩遣統制閻阜  
通判建昌軍蔡延世襲擊李敦仁禽其弟世雄世臣

五月丙辰朔蠲江西路被賊州縣賦稅丁酉詔呂頤  
浩朱勝非劉光世並兼淮南諸州宣撫使始奪李成  
官戊戌以張用為舒蘄鎮撫使癸卯作大宋中興寶  
成金人犯和尚原吳玠擊敗之丙午初復召試館職  
之制劉光世遣統制王德襲楊州執郭仲威以獻伏  
誅辛亥水軍統制邵青叛圍太平州趙彬及金人合  
兵圍慶陽府守臣楊可昇擊敗之甲寅命知南外宗  
正事令應選年幼宗子將育于宮中詔收耆戶長役  
錢已未詔州縣因軍期徵取民財物者立式榜示禁  
過數催擾庚申孔彥舟引衆過潭州馬友迎擊大敗



之彥舟趨岳州犯鄂州李允文以彥舟為湖東副總  
管屯漢陽辛酉以直秘閣宗綱為荆南鎮撫司措置  
營田官樊賓為副壬戌劉光世招降邵青趙延壽據  
分寧縣呂頤浩招降之是月張俊及李成戰于黃梅  
縣殺馬進成敗遁歸劉豫李忠譚充各率兵歸張浚  
浚命王庶分其兵張用復叛寇江西岳飛招降之湖  
州進士吳木上書論宰執送徽州編管六月己巳始  
鬻南承直修武郎以下官壬申冊謚皇太后曰昭慈獻  
烈甲戌張琪犯餘杭州又犯宣州乙亥月犯心庚辰  
湖賊楊華揚廣犯鼎州程昌寓拒卻之上虞縣丞婁

寅亮上書請選立繼嗣壬午權檟昭慈獻烈皇后于  
越州張琪犯徽州守臣郭東棄城去琪入據之癸未  
張浚引大兵至瑞昌縣之丁家洲李允文自鄂部兵  
歸浚浚并其兵護允文赴行在邵青率舟師至鎮江  
甲申復叛去丁亥崇安民廖公昭合范汝為餘黨熊  
志寧作亂衆既散志寧復與建陽民丁朝佐合兵陷  
二縣戊子慮囚己丑邵青犯江陰軍之福山遣海州  
鎮撫使李進彥中軍統制耿進率舟師會劉光世討  
之南安賊吳忠宋破壇劉洞天作亂庚寅江西提刑  
司遣官討之破壇洞天皆伏誅忠遁去癸巳熙河統

制關師古洮東安撫郭玠同討熙州叛兵連敗之甲午廣賊鄧慶龔富圍南雄州守臣鄭成之率兵民以拒蠲建劔汀州邵武軍租是月知虢州邵興屯盧氏縣為河南統制董先所破走興元先遂取商虢二州張浚承制以吳玠為陝西諸路都統制時關隴六路盡陷止餘階成岷鳳洮五郡鳳翔之和尚原隴州之方山原黏罕既得陝西地悉與偽齊秋七月乙未朔以馬友權荆湖東路副總管趣討孔彥舟統制潘達後軍將胡江等叛破玉山弋陽永豐三縣遣樞密院準備將領徐文討之戊戌吳錫復入邵州庚子以岳

飛為神武右副軍統制留軍洪州彈壓盜賊辛丑封  
伯右武衛大將軍令詒為安定郡王壬寅虔州賊陳  
顥作亂命趣捕之甲辰詔秘書省長貳通修日曆丙  
午劉光世遣將喬仲福擊邵青于常熟為所敗撻懶  
自宿遷北歸戊申韓世清追襲張琪復祈門縣庚戌  
張俊執傅雱赴行在張浚以曲端屬更以武臣康隨  
提點夔路刑獄與王庶雜治之辛酉召呂頤浩赴行  
在張琪犯饒州頤浩遣閩臯擊敗之琪黨姚興降琪  
走徽州癸亥范宗尹罷是月珍州守臣李玠棄城去  
王彥數擊敗李忠趙彬來歸張浚承制以彬為陝西

轉運使又以涇原兵馬都監李彥琪為本路副總管  
彥琪尋叛去八月丙寅以孔彥舟為蘄黃鎮撫使丁  
卯以知潭州吳敏為荆湖東西廣南路宣撫使張浚  
殺曲端于恭州獄張用部兵至瑞昌歸張浚浚以用  
為本軍統制戊辰張守等上紹興重修敕令格式癸  
酉復以汪伯彥為江東安撫大使乙亥呂頤浩遣將  
李鑄復舒州丁丑祔昭慈獻烈皇后神主于温州太  
廟戊寅張守罷以李回參知政事富直柔同知樞密  
院事庚辰杜湛及劉超戰于彭山為所敗辛巳超及  
楊華楊廣合兵復寇鼎州程昌寓遣湛率舟師擊敗

之遣辛企宗移軍福州討熊志寧胡江等諸賊韓世清及張琪戰世清敗琪復入祈門縣壬午命張俊遣兵捕之鑄紹興錢癸未詔許邵青張琪脅從徒黨自新乙酉以李成在順昌恐復謀亂遣使齎蠟書諭淮寧蔡州將士立賞格募人禽斬成丁亥以秦檜為尚書右僕射同中書門下平章事兼知樞密院事庚寅復李綱資政殿大學士募人往京東河南伺察金齊動止仍齎詔慰撫忠義保聚之人蔡州鎮撫使范福棄城去以土豪李祐代之辛卯蠲徽州被賊民家夏稅壬辰置三省樞密院賞功房是月知鄂州曹成掠

湖西犯沅州與知復州李宏合屯瀏陽既而攻宏宏奔潭州九月甲午朔張琪黨李捧犯宣州守臣李彥卿及韓世清擊却之詔江東西路安撫使復治建康府洪州以王瓌知池州楊惟忠知江州並兼管內安撫使率部兵赴官丙申斬李世臣己亥以資政殿學士葉夢得為江南東路安撫大使兼壽春等六州宣撫使庚子張琪復陷宣州已乃遁去辛丑命王瓌討琪丁未詔歲再遣使者謁諸陵因撫問河南將士命馬友移屯鄂州庚戌命宗室右監門衛大將軍士芑朝饗温州太廟辛亥合祭天地于明堂太祖太宗並

配大赦罷諸州守臣節制軍馬錄用元符末上書人  
子孫癸丑復以呂頤浩為尚書左僕射同中書門下  
平章事兼知樞密院事丁巳王彥破李忠子秦郊店  
忠奔歸劉豫戊午禁福建轉運司抑民出助軍錢落  
范宗尹觀文殿學士己未初措置河南諸鎮屯田以  
戶部尚書孟庾為江東西湖東等路宣諭制置使辛  
酉詔四方有建策能還兩宮者實封以聞有劾者賞  
以王爵壬戌遣御史胡世將督捕福建盜賊是月長  
星見冬十月乙丑詔蔡京王黼門人實有才能者公  
舉叙擢李回罷丙寅朱勝非分司江州居住丁卯以



李允文恣睢專殺賜死大理獄己巳王德招邵青降之庚午以孟庾叅知政事微猷閣直學士湯東野為江淮發運使劉洪道招降李捧董旺壬申置行在大宗正司癸酉兀术攻和尚原吳玠及弟璘力戰大敗之兀术僅以身免丁丑增置諸路武尉戊寅以張俊為太尉移屯婺州壬午初置見錢關子招人入中以給軍食范汝為復叛入建州守臣王浚明棄城走辛企宗退屯福州甲申劉超請降以超守光州戊子崔紹祖伏誅詔邵青以舟師赴行在己丑升越州為紹興府李成軍正李璣伏誅知承州王林禽張琪于楚

州檻送行在壬辰錄程頤孫易為分寧令癸巳范汝  
為犯邵武軍守臣吳必明統制李山率兵拒之衆潰  
退保光澤縣關師古復秦州獲郭振是月劉豫遣將  
王世冲寇廬州守臣王亨大破之斬世冲曹成及馬  
友戰于潭州成敗還攸縣王才遣將丁順圍濠州劉  
光世遣兵攻橫澗山順解圍去十一月乙未葉夢得  
至建康以詔招王才降之丙申遣內侍撫問孔彥舟  
桑仲丁酉榜諭福建江東羣盜赦其脅從者戊戌詔  
移蹕臨安以孟庾為福建江西荆湖宣撫使神武左  
軍都統制韓世忠副之仍命械謝嚮陸蒙赴行在己

亥以婁寅亮為監察御史范汝為犯光澤縣李山走  
信州辛丑續編紹興太常因革禮桑仲請正劉豫惡  
逆之罪詔進幸荆南乙巳以右司諫韓璜黨富直柔  
責監潯州稅張琪伏誅庚戌富直柔罷荆湖廣西宣  
撫使吳敏始受命置司柳州辛亥升康州為德慶府  
壬子詔內外侍從各舉所知三人丙辰程昌寓遣杜  
湛擊楊華敗之命張浚遣使持詔招曹成以所部赴  
行在己未楊華請降辛酉命吏部侍郎李光節制臨  
安府內外諸軍壬戌曹成犯安仁縣執安撫使向子  
諲進攻道州是月前知鄆州李惟德以岷州來歸吳

玠始遣人通書夏國十二月乙丑吳敏罷丙寅復置  
樞密院都承旨范汝為遣葉澈寇南劍州守臣張翬  
拒戰大破之己巳遣吏部侍郎傅崧卿為淮東宣諭  
使甲戌遣江東安撫司統制郝最顏孝恭討建昌軍  
賊乙亥辛企宗罷仍遣三官率兵赴軍前自效丁丑  
蠲諸路在官積欠詔官戶名田過制者與民均科以  
岳飛為神武副軍都統制部兵屯洪州曹成陷道州  
守臣向子志棄城走戊寅以禁出求直言增行在職  
事官職錢遣駕部員外郎李愿撫諭川陝己卯詔兩  
浙分東西路置提點刑獄庚辰桑仲遣兵寇復州守

臣俎適棄城去辛巳復置廣西提舉茶鹽司知海州  
薛安靖殺僞都巡檢使王企中率軍民以城來歸增  
諸路酒錢以備軍費甲申知龍州范綜統制雷仲舉  
兵復水洛城己丑起復陝西都統制吳玠為鎮西軍  
節度使詔江西安撫司趣兵討捕吳忠是月劉豫遣  
將王彥充攻壽春府桑仲遣李橫復寇金州王彥拒  
戰于馬郎嶺大破之均州平蔡州褒信縣弓手許約  
叛據光州階州安撫孫注復洮州龔富等圍南劍州

本紀第二十六

本紀卷第二十七

宋史二十七

開禧三司舊錄國事新書丞相兼修國史領經筵事都總裁脫脫

勅修

高宗四

二年春正月癸巳朔帝在紹興府率百官遙拜二帝  
不受朝賀甲午詔復置賢良方正直言極諫科丙申  
賜楊邦乂謚曰忠襄韓世忠圍建州丁酉蠲諸路元  
年逋稅庚子陝西叛將白常圍岷州關師古率兵破  
之辛丑韓世忠拔建州范汝爲自焚死斬其二弟餘  
黨悉平壬寅帝發紹興曹成釋向子諲丙午帝至臨

安府壬子遣韓世清捕石陂賊癸丑以張俊檢校少  
保定國軍節度使劉豫遣兵犯伊陽縣翟興及其將李  
恭合擊敗之曹成犯郴州永興縣己未修臨安城辛  
酉遣內侍任源撫問張浚江西副總管楊惟忠以楊  
勅雖就招安復謀作亂誘誅之二月甲子楊華復叛  
擾鼎澧潭三州詔立賞禽捕首領赦貸脅從丙寅命  
劉光世將銳卒萬人屯楊州經理淮東庚午以李綱  
爲觀文殿學士湖廣宣撫使仍命岳飛率馬友李宏  
韓京吳錫等共討曹成諸盜甲戌以吏部尚書李光  
爲淮西招撫使王瓚副之乙亥雨雹丙子以施達謝

嚮陸棠黨范汝爲達除名婺州編管嚮棠械赴行在  
俱道死丁丑分崔增李捧邵青趙延壽李振單德忠  
徐文所部兵爲七將名御前忠銳軍隸步軍司非樞  
密奉旨不許調遣減淮南營田歲租三之二俟三年  
復舊已卯劉光世入見同執政對內殿諭以進屯楊  
州光世迄不行庚辰詔監司避本貫壬午程昌寓遣  
杜湛募兵攻賊周倫破之甲申以工部員外郎滕茂  
實死節于代州贈龍圖閣直學士丙戌初置著作官  
二員修日曆己丑復荊湖東西爲荊湖南北路南路  
治潭北路仍治鄂申禁福建路私有私造兵器是月



知商州董先叛入劉豫金人陷慶陽府執楊可昇降  
之三月壬辰朔命襄鄧鎮撫使桑仲收復陷沒諸郡  
仍命諸鎮撫使互相應援再貶徐秉哲惠州吳玠南  
雄州莫儔韶州並居住水賊翟進襲漢陽軍殺守臣  
趙令弒李光執韓世清于宣州以歸虔化縣賊李敦  
仁及其徒皆授官隸諸軍乙未復置江陰軍罷福建  
路武尉戊戌葉夢得罷以李光爲江東安撫大使兼  
滁濠等六州宣撫使罷江淮發運司桑仲如郢州調  
兵守將霍明以仲將謀逆殺之以其事聞庚子金人  
攻方山原陝西統制楊政援之金兵引去辛丑又犯

隴安縣吳璘等擊走之淮南營田副使王寔括閒田  
三萬頃給六軍耕種丙午復置中書門下省檢正官  
省樞密院檢詳官己酉以神武右軍中部統制楊沂  
中爲神武中軍統制癸丑河南鎮撫使翟興爲部將  
楊偉所殺甲寅金人復自水洛城來攻楊政等又敗  
之庚申曹成寇賀州清水砦守臣劉全棄城去是月  
知壽春府陳卞及鈐轄陳寶等舉兵復順昌府尋引  
兵歸爲僞齊所逐并壽春失之夏四月甲子曹成陷  
賀州陳顥圍循州焚龍川縣命江西安撫司遣將捕  
之丙寅賜禮部進士張九成以下二百五十九人及

第出身庚午以翰林學士承旨翟汝文參知政事壬申釋福建諸州雜犯死罪以下囚江西軍賊趙進寇瑞昌縣楊惟忠討降之戊寅偽齊統領王資率兵來歸富順監男子李勃偽稱徐王召赴行在壬午詔內外侍從監司守臣各舉中原流寓士大夫三二人以備任使癸未詔曰朕登庸二相倚遇惟均其所薦用之人不得偏私離間朋比害政謚孫傳曰忠定乙酉李綱始拜命置司福州是夜太平州軍士陸德據城叛囚守臣張鎔殺當塗縣令鍾大猷戊子命呂頤浩都督江淮荆浙諸軍事庚寅劉豫徙居汴京是月王

彥大破董先于馬嶺關復商州閏月癸巳高麗遣使  
入貢乙未知池州王進討陸德誅之丙申岳飛擊破  
曹成于賀州置都督府隨軍轉運司丁酉左朝奉郎  
孫覲坐前知臨安府贓汙貸死除名象州羈管罷後  
苑工作辛丑韓世清以狂悖伏誅丙午岳飛敗曹成  
于桂嶺縣成走連州遣統制張憲追擊破之又走郴  
州入邵州丁未賜福建宣撫司賞軍錢十萬緡聽朱  
勝非自便乙卯詔諸鎮撫使非奉朝旨毋擅出兵劉  
光世聞父喪去官特命起復己未詔自今明堂專祀  
昊天上帝以太宗配是月張浚命利夔制置使王庶

與知成都府王似兩易其職襄鄧副都統制李橫同  
副都統制李道合兵圍郢州霍明遁去五月辛酉以  
兵部尚書權邦彥簽書樞密院事以樞密將領趙琦  
所部兵爲忠銳第八將癸亥呂頤浩出師以神武後  
軍及忠銳兩將從行百官班送甲子以霍明權襄鄧  
隨郢州鎮撫使詔觀察使已上各薦可備將帥者二  
人丁卯罷兩浙轉運司回易庫已巳廢紹興府餘姚  
上虞縣湖田爲湖溉民田庚午詔修建康行宮辛未  
選宗室子偁之子伯琮育于禁中丙子呂頤浩總師  
至常州前軍將趙延壽兵叛于呂城鎮丁丑延壽犯

金壇縣殺知縣胡思忠願浩稱疾不進戊寅海州賊  
王山犯漣水軍總領蘇復副統制劉靖會兵擊敗之  
庚辰臨安府火癸未置御前軍器所甲申親慮囚自  
是歲如之罷行在權官乙酉劉光世遣王德追趙延  
壽叛兵至建平縣悉誅之丙戌置修政局命秦檜提  
舉詔侍從臺省寺監官監司守令條具省費裕國彊  
兵息民之策丁亥以中書門下省檢正官仇恂爲沿  
海制置使戊子手詔用建隆故事命百官日輪一人  
轉對兩浙轉運副使徐康國獻銷金屏障詔有司毀  
之奪康國二官蠲太平州被賊之家夏稅是月張浚

以參贊軍事劉子羽知興元府黜王庶復以王似知  
成都府韓世忠至洪州遣董昉招曹成成聽命赴行  
在六月庚寅朔李宏引兵入潭州執馬友殺之甲午  
李綱領兵三千發福州戊戌詔孟庾韓世忠班師岳  
飛屯駐江州庚子以劉光世爲寧武寧國軍節度使  
韓世忠爲太尉移屯建康府辛丑以李橫爲襄郢鎮  
撫使李道鄧隨鎮撫使壬寅翟汝文罷孔彥舟叛降  
僞齊乙巳以權邦彥兼權叅知政事戊申仇愈兼制  
置福建路辛亥免臺諫官輪對甲寅召呂頤浩赴行  
在令參謀官傅崧卿權主管都督府事詔兩浙江淮

守臣令存撫東北流寓人乙卯韓世忠遣統制解元  
巨振入潭州執李宏以歸秋七月辛酉悉蠲福建諸  
州被兵之家田稅壬戌復置湖北提舉茶鹽司甲子  
罷福建提舉市舶司己巳起復翟琮爲河南府孟汝  
唐州鎮撫使甲戌罷淮東路提點刑獄司丙子馬友  
黨郝通率兵五萬歸宣撫司戊寅知廬州王亨復安  
豐壽春縣己卯呂頤浩入見庚辰韓世忠討劉忠駐  
兵于岳州之長樂渡大破之忠走淮西丁亥詔編次  
建炎以來譜牒八月壬辰以孟庾兼權同都督江淮  
荆浙諸軍事癸巳順昌縣賊余勝等作亂通判南劔



州王元鼎捕殺之甲午安定郡王令話薨丙申詔郡  
守除罷赴闕皆得引對臨安府火以知江州劉紹先  
爲沿淮防遏使戊戌命朱勝非提舉醴泉觀兼侍讀  
日赴朝堂議事沿海州縣籍民海舶每歲一更守海  
道險要振福建饑民己亥停傳零官英州羈管庚子  
詔孟庾韓世忠總大兵至建康進赴行在戊申給事  
中胡安國以論朱勝非罷宰執臺諫上疏留之皆不  
報江西統制傅樞討平南雄賊吳忠鄧慶劉軍一等  
己酉賜吳玠田甲寅秦檜罷給事中程瑤等坐論駁  
朱勝非疑其黨檜並落職主宮觀禁出胃乙卯減膳

戒輔臣修闕政罷脩建康行宮九月戊午朔落秦檜  
職己未罷修政局辛酉以彗出大赦許中外臣民直  
言時政陝西諸叛將許令自新壬戌王倫自金國使  
還入見遣潘致堯等爲金國軍前通問使附茶藥金  
幣進兩宮甲子以直徽猷閣郭偉爲淮西巡撫使乙  
丑復以朱勝非爲尚書右僕射同中書門下平章事  
兼知樞密院事戊辰司空山賊李通出降以爲都督  
府親軍統領癸酉以右朝請大夫呂源爲浙東福建  
沿海制置使治定海縣知建昌軍朱芾擊石陂賊余  
照禽斬之甲戌彗沒丙子復以郭仲荀爲武泰軍節

度使詔墨敕有不當者許三省樞密院奏稟給事中  
中書舍人繳駁臺諫論列有司申審庚辰命福建提  
舉茶鹽官兼領市舶司辛巳以韓世忠爲江南東西  
路宣撫使他帥臣稱宣撫使者並罷壬午遣監察御  
史明橐等五人宣諭江浙湖廣福建諸路仍降詔諭  
官吏以遣使按察勸懲誅賞之意癸未新作行宮南  
門成甲申提轄樵貨務張純浚立淮浙鹽法增其筭  
總領四川財賦趙開初變四川鹽法盡權之乙酉太  
白晝見丙戌以知興元府王似爲川陝宣撫處置副  
使丁亥封右監門衛大將軍榮州防禦使令時爲安

定郡王是月韓世忠遣統制解元襲擊劉忠于蘄陽  
大破之忠奔劉豫冬十月戊子朔置牧馬監于饒州  
庚寅李勃伏誅丙申初置江浙荆湖廣南福建路都  
轉運使甲辰潘致堯至楚州通判州事劉晏劫其禮  
幣奔劉豫守臣柴春戰死戊申以知平江府趙鼎爲  
江東安撫大使丙辰禁溫台二州民結集社會班度  
量權衡于諸路禁私造者是月顏孝恭招降石陂餘  
賊李寶等十一月辛酉陳顥陷汀州武平縣犯梅循  
二州乙丑初權明州鹵田鹽辛未議將撫師江上召  
侍從官條具利害甲戌命李綱劉洪道程昌寓解潛

會兵捕討胡寇楊太戊寅范汝爲餘黨范忠掠龍泉  
縣庚辰詔宣諭五使焚所至州縣建炎以前已蠲稅  
籍癸未臨安大火是月關師古敗僞齊兵于抹邦山  
馬友黨步諒詣李綱降綱入潭州其黨郝段降王進  
吳錫禽王浚湖南盜賊悉平十二月丁亥朔命神武  
前軍統領申世景等討捕范忠已丑僞稱榮德帝姬  
易氏伏誅范忠犯處州巨師古引兵入廬州執王亨  
送行在甲午李綱罷臨安府火丙申振被火家罷浙  
東沿海制置司丁酉岳飛遣統領徐慶王貴討禽萍  
鄉賊高聚已亥以胡舜陟爲廬壽等州鎮撫使金人

侵熙秦關師古擊敗之庚子遣駕部員外郎李愿撫諭川陝江西兵馬副鉉轄張中彥坐縱暴不法斬于潭州辛丑程昌寓遣杜湛討楊欽等敗之殺三千餘人癸卯川陝宣撫司類試陝西發解進士得周謨等十三人以便宜賜進士出身甲辰罷張浚宣撫處置使仍知樞密院以知夔州盧法原爲川陝宣撫處置副使及王似同治司事己酉遣司封員外郎周隨亨同撫諭川陝庚戌孟庾自建康來朝辛亥金人犯商州守將邵隆退屯上津李橫敗僞齊兵復汝州甲寅命孟庾同都督江淮荆浙諸軍事詔都督府總治江

東西湖北浙西帥臣經畫屯田張浚承制以歸州隸夔州路是冬金人犯和尚原將士乏食自潰吳玠拔砦棄去虔賊謝達犯惠州

三年春正月丁巳朔帝在臨安率百官遙拜二帝不受朝賀江西將李宗諒誘戍兵叛寇筠州統領趙進擊卻之翟琮入西京禽僞齊留守孟邦雄命諸路憲臣兼提舉常平司庚申金人犯上津李橫破潁順軍僞齊知軍蘭和降壬戌金人犯金州洵陽縣以仇愈爲福建兩浙淮東路沿海制置使癸亥陳顥圍潮州不下引兵趨江西甲子李橫復潁昌府乙丑詔中外

刑官各務仁平臺憲檢察月具所平反以聞歲終考  
察殿最金人陷金州鎮撫使王彥楚積聚退保西鄉庚  
午罷行在宗正司命嗣濮王仲湜兼判大宗正事辛  
未震電雨雹造渾天儀李通爲其徒王全所殺壬申  
命西外宗正移司福州癸酉復祭大火以湯東野爲  
淮東安撫使乙亥以李橫爲襄陽府鄧隨郢州鎮撫  
使丁丑登萊山砦統制范溫率部兵泛海來歸庚辰  
詔春秋望祭諸陵張浚論奏王似不可爲副因引罪  
求罷不報癸未詔民復業者視墾田多寡定租額賦  
役乙酉減淮浙蠶鹽錢二月丁亥朔升桂州爲靜江



府己丑權邦彥薨浙東賊彭友犯龍泉縣辛卯李通  
餘黨劉德園舒州吳玠遇金人于饒風關王彥自西  
鄉來會金人分兵攻關統制郭仲敗走丁酉饒風關  
破玠趣西縣彥奔達州四川大震張浚被罷職之命  
以諸軍方潰因秘不行復具奏審己亥金帥撒離局  
入興元府經畧使劉子羽焚其城走三泉縣吳玠退  
屯仙人關庚子以宗子伯琮爲和州防禦使賜名瑗  
尋改貴州辛丑蠲廣東諸州被賊民家稅壬寅鄭州  
兵馬鈐轄牛皐彭玘率兵與李橫會橫以便宜命皐  
爲蔡唐州鎮撫使玘知汝州乙巳翟琮遣統制李吉

敗偽齊兵于伊陽又殲其將梁進之衆丁未王似始  
受宣撫副使之命戊申虔賊周十隆犯循梅汀州詔  
統制趙祥等合兵捕之庚戌以李橫爲神武左軍副  
統制京西招撫使改胡舜陟爲淮西安撫使辛亥以  
工部尚書席益參知政事翰林學士徐俯簽書樞密  
院事壬子王全犯廬州甲寅詔守臣至官半年具上  
民間利害或邊防五事李橫遣人奏潁昌之捷詔許  
橫便宜行事乙卯劉光世遣酈瓊等屯兵泗州爲李  
橫聲援是月張浚復以王庶爲參謀官往巴州措置  
時金兵深入至金牛鎮疑有伏由褒斜谷引兵還興

元吳玠劉子羽追擊其後殺獲甚衆三月己未詔岳  
飛捕虔賊壬戌申命統制巨師古部兵萬人屯楊州  
胡舜陟至廬州王全降甲子以趙鼎爲江西安撫大  
使李橫傳檄諸軍收復東京己巳金人遣兵援劉豫  
李橫敗走潁昌復陷壬午以韓世忠爲淮南東路宣  
撫使李綱遣兵擊降李宗諒詔戮于市夏四月丁亥  
朱勝非以母喪去位僞齊知虢州董震及其統制董  
先來歸以震權商號陝州鎮撫使己丑詔江東西湖  
北浙西募民佃荒田蠲三年租辛卯以劉光世爲檢  
校太傅江南東路宣撫使金人去興元壬辰徙都督

府于鎮江岳飛軍次虔州甲午僞齊知唐州胡安中  
來歸丙申僞齊李成攻陷虢州董先牛皋犇襄陽己  
亥改謚昭慈獻烈皇后爲昭慈聖獻復舉五帝日月  
之祀庚子增文武小官奉辛丑荆南統制羅廣率兵  
至鼎州楊太衆益盛自號大聖天王立鍾相少子子  
義爲太子廣等不克討而還丁未岳飛遣統領張憲  
王貴擊彭友禽斬之劉忠爲部下王林所殺傳首行  
在戊申以浙西兵馬鈐轄史康民所部兵爲忠銳第  
九將己酉張浚奏王庶王似盧法原威望素輕乞命  
劉子羽吳玠並爲判官不報辛亥徐文叛奔僞齊五

月丙辰以翟琮爲河南府孟汝鄭州鎮撫使董先爲副使丁巳遣樞密計議官任直清撫諭襄陽商虢河南諸鎮己未命楊沂中招捕嚴州盜賊辛酉建睦親宅以董先爲商虢陝州鎮撫使徵河南布衣王忠民爲宣教卽至行在辭不受壬戌潘致堯還言金人欲重臣通使以取信遂寢出師之議乙丑罷諸州在任守臣所辟通判丁卯以韓肖胄等充金國軍前通問使安化蠻犯邊廣西經畧使許中發兵擊之戊辰楊沂中招降嚴州賊繆羅等捕斬其徒百人魔賊平庚午以岳州數被兵免今年稅役壬申詔守令尉佐境

內妖民聚集不能覺察致亂者並坐罪知建昌軍朱  
芾討南豐縣賊禽誅其魁黃琛乙亥以方與金國議  
和禁邊兵犯齊境丙子王彥復金州金兵棄均房去  
韓世忠請以大軍還鎮江己卯詔淮南統制解元成  
泗州餘屯江北周隨亭李愿宣押王似盧法原至閬  
州張浚始解使事時已論金牛之功以吳玠爲利州  
路階成鳳州制置使劉子羽爲寶文閣直學士王彥  
爲保大軍承宣使僚屬將帥第賞有差庚辰浚及子  
羽王庶劉錫等赴行在詔李橫等收軍還鎮辛巳罷  
宣撫司便宜黜陟六月甲申朔統制巨師古坐違韓

世忠節制除名廣州編管丙戌復置六部架閣庫丁亥禁諸路招納淮北人及中原軍來歸者戊子復元祐宰相呂大防官職贈謚庚寅詔降川陝死罪囚釋流以下賞吳玠關師古將士壬辰張浚至綿州復奏王似不可任甲午命王玠率諸軍討楊太己亥罷沿海制置司丁未置國子監及博士弟子貢戊申以王林所部兵爲忠銳第十將己酉岳飛自虔州班師辛亥發兵屯虔虔廣二州彈壓盜賊州各三千人是月金人圍方山原王似命吳玠發兵救之秋七月己未復置博學宏詞科初許任子就試甲子以久旱償州

縣和市民物之直丁卯詔訪求累朝勲臣曹彬等三百人子孫以備錄用戊辰王瓌以舟師發行在己巳詔減膳禁屠弛工役罷苛燒命兩浙及諸路憲臣親按部錄囚辛未蠲紹興二年和市純帛癸酉呂頤浩等以旱乞罷政帝賜詔曰與其去位曷若同寅協恭交修不逮思所以克厭天心者頤浩等乃復視事乙亥朱勝非起復丙子泉州水溢壞城丁丑遣中使逆趣張浚于道是月四川霖雨地震八月己丑詔岳飛赴行在留精兵萬人戍江州翟琮率兵突圍犇襄陽詔屯駐其地癸卯罷諸路輸禁軍闕額錢甲辰以兩



賜不時蘇湖地震求直言乙巳復置史館修撰直館  
檢討官命郎官兼領著作郎及佐郎戊申罷都轉運  
司己酉詔湖南丁米三分之二均取于民田其一取  
之丁口辛亥孟庾自軍中來朝九月戊午呂頤浩罷  
詔凡遇水旱災異監司郡守即具奏毋隱庚申岳飛  
自江州來朝川陝統領官吳勝敗偽齊兵于黃堆砦  
丙寅以趙鼎爲江西安撫制置大使壬申詔中書舍  
人給事中凡制敕非軍期機速必先書押而後報行  
甲戌偽齊王彥先寇徐宿二州乙亥以劉光世爲江東  
淮西宣撫使置司池州韓世忠爲鎮江建康府淮南

東路宣撫使置司鎮江府王夔爲荊南府岳鄂潭鼎  
澧黃州漢陽軍制置使置司鄂州岳飛爲江南西路  
舒蘄州制置使置司江州主管殿前司郭仲荀知明  
州兼沿海制置使神武中軍統制楊沂中兼權殿前  
司已卯吳勝克蓮花城冬十月癸未朱勝非上重修  
吏部七司敕令格式庚寅加吳玠檢校少保壬辰趣  
王夔進兵詔寬私鹽重法甲午卻大理國入貢丁酉  
殘破州縣視戶口增損立守令考課法己亥禁州縣  
擅增置稅場僞齊李成陷鄧州辛丑南丹蠻莫公晟  
圍觀州楚寶積監殺知監陳烈壬寅僞齊兵逼襄陽

李橫以糧盡棄城奔荆南知隨州李道亦棄城去甲辰王瓌討湖賊戰于鼎口不利僞齊陷郢州守臣李簡棄城去申禁私役戰士丁未命三省除銓曹姦弊戊辰罷諸路類省試統制石世達及杜湛合兵大破湖賊黃誠于龍陽洲庚戌復置宗正少卿及寺監諸丞是月王彥先引兵至北壽春將渡淮劉光世駐軍建康扼馬家渡又遣酈瓊駐無爲軍爲廬濠聲援賊乃還十一月己未以右文殿修撰王倫爲都督府參議官癸亥詔監司帥守察内外宗子病民害政者以聞崔增吳全遇湖賊于陽武口死之甲子韓肖胄等

使還乙丑禁沿淮諸砦兵擅侵齊境庚午臨安府火  
甲戌禁掠賣生口入蠻夷峽峒又以銅錢出中國乙  
亥復元祐十科舉士法丁丑命賓橫宜觀四州市戰  
馬戊寅王瓌自鼎州引兵還鄂留統領王渥等四軍  
聽程昌寓節制己卯蠲南劍州所負民間獻納錢十  
六萬緡省淮南州縣文武官十二月辛巳朔降勅書  
撫諭吳玠及川陝將士乙酉臨安府火戊子又火朱  
勝非以屢火求罷不允丙申王似承制廢通遠軍己  
酉金國元帥府遣李永壽王翊來見是歲海寇黎盛  
犯潮州焚民居毀城去

四年春正月辛亥朔帝在臨安率百官進拜二帝乙卯增淮浙路鹽鈔貼納錢遣章誼等爲金國通問使己未程昌寓遣杜湛王渥攻楊太皮真砦破之己巳詔諭王似盧法原吳玠使之協和金人犯宕昌臨江砦及花石峽關師古遣統領劉戩分兵拒却之庚午詔諸路將帥毋以兩國通使輒弛邊備淮南州郡津渡尤慎譏察甲戌罷州縣新置弓手乙亥蠲循梅潮惠四州被兵家租賦丙子申敕三省樞密院除官並遵舊制毋相侵紊除拜罷免皆明示黜陟之由戊寅金人犯神垵砦浚北嶺至大散關臨安府火己卯韓

肖胄罷二月壬午詔賊罪至死者仍籍其貲癸未作  
建康府行宮席益罷乙酉以徐俯兼參知政事丙戌  
禁川陝諸將招納北軍湖北軍賊檀成犯長陽縣解  
潛遣統領胡勉捕斬之群盜田政自襄陽犯陝州己  
丑解潛遣統制王恪擊政斬之庚寅金人犯兩當縣  
乙未詔孟庾赴行在己亥詔三衙管軍及將帥觀察  
使以上舉忠勇智畧可自代者一人辛丑金人犯仙  
人關癸卯詔權以射殿爲景靈宮四時設位朝獻丙  
午張浚入見三月辛亥朔吳玠率楊政吳璘田晟王  
喜諸將與兀朮戰于仙人關大敗之兀朮遁去戊午

雨雹以趙鼎參知政事壬戌孟庾至行在罷都督府  
以其兵屬張俊乙丑張浚以資政殿大學士罷尋落  
職奉祠福州居住己巳蠲淮南州縣民租一年辛未  
日有青赤黃氣綿次建炎以來詔旨頒諸路癸酉蠲  
興元府洋州被兵家稅役二年丙子以王似爲資政  
殿學士川陝宣撫使盧法原爲端明殿學士與吳玠  
並充副使關師古爲熙河蘭廓路安撫制置使夏四  
月庚辰朔命趙開再任總領四川財賦詔諭川陝官  
吏兵民以張浚失措當示遠竄猶嘉其所用吳玠等  
能禦大敵許國一心止從薄責仍令宣撫司講求諮

訪凡擾民沸衆之事速釐革之癸未劉子羽白州安  
置乙酉詔明堂用皇祐典禮無祀天皇帝神州地  
祇以下諸神丙戌吳玠敗金兵復鳳秦隴州詔特旨  
處死情法不相當者許大理奏審蜀淮南州軍上供  
錢一年庚寅置孳生牧馬監于臨安府甲午罷廣西  
提舉茶鹽司關師古叛以洮岷二州降偽齊吳玠併  
將師古軍乙未詔諸路歲上戸口丁酉罷諸州田易  
庫庚子命劉光世遣兵巡邊辛丑保靜州夷人入貢  
丙午徐俯罷是月王似承制廢符陽軍知壽春府羅  
興叛降偽齊五月庚戌朔以岳飛兼黃復二州漢陽



軍德安府制置使癸丑以范冲爲宗正少卿兼直史  
館重脩神宗哲宗正史實錄甲寅詔淮南帥臣兼營  
田使守令以下兼管營田岳飛復郢州斬僞齊守荆  
超甲子以孟庾兼權樞密院事乙丑賜李橫軍綽萬  
匹丙寅李成棄襄陽去岳飛復取之金人攻金州鎮  
撫使王彥遣統制許青等與戰于漢陰敗之罷諸縣  
武尉壬申裁省三省樞密細務責六曹長貳專決癸  
酉以國史日曆所爲史館僞齊收李成餘衆益兵駐  
新野岳飛與別將王萬夾擊復大敗之乙亥王彥數  
敗金兵于洵陽縣丙子復選宗室子彥之子伯玖育

于禁中六月壬申復命川陝類試乙未太白晝見經  
天戊戌詔神武軍神武副軍統制統領官並隸樞密  
院庚子以霖雨罷不急之役壬寅詔三省樞密院凡  
奉干請墨勅許執奏不行置史館校勘官作明堂行  
禮殿于教場甲辰禁諸軍彊刺平人爲兵已刺者皆  
釋之吳玠乞宮觀不允是月熒惑犯南斗岳飛將牛  
皐復隨州執僞齊守王嵩礫之秋七月戊申朔曲赦  
虔州以吏部尚書胡松年簽書樞密院事庚戌以湖  
南安撫席益爲安撫制置大使建昌軍軍卒修達等  
作亂殺守臣劉滂江西制置使胡世將遣參謀侯慤

統制丘贊討之壬子命吳玠通信夏國癸丑湖賊楊  
欽等破社木砦官軍敗卻小將許奎戰歿丙辰賞仙  
人關之功以吳玠爲檢校少師奉寧保靜軍節度使  
吳璘揚政以下論賞有差丁巳命左右司歲考郎官  
功過治狀以爲賞罰庚申復曲端趙哲官壬戌岳飛  
遣統制王貴張憲擊敗李成及金兵于鄧州之西復  
鄧州禽其將高仲丙寅侯懋引兵入建昌軍執脩達  
等十三人斬之罷建州臘茶綱詔江東安撫司招水  
軍千五百人已巳湖賊萬餘人詣鼎澧二州降劉光  
世來朝庚午王貴張憲破金齊兵復唐州及信陽軍

襄漢悉平辛未章誼孫近使還入見粘罕致書約淮南毋得屯兵八月庚辰以趙鼎知樞密院事充川陝宣撫處置使湖賊夏誠等犯枝江縣解潛遣將蔣定舟與戰敗之辛巳吳玠遣統領姚仲攻隴城縣克之壬午王瓌以討賊無功降光州觀察使戊子改命趙鼎都督川陝荆襄諸軍事乙未遣魏良臣等充金國通問使丙申毀王安石舒王告己亥周十隆出降爲官軍所掠復遁去犯汀循州壬寅王似罷以岳飛爲清遠軍節度使湖北荆襄潭州制置使代王瓌討湖賊癸卯以襄陽府隨郢唐鄧州信陽軍六郡爲襄陽

府路九月戊申減淮浙路鹽鈔所增貼納錢壬子夏  
誠遣將李全功犯公安軍解潛遣統制林閏等擊斬  
之安定郡王令時薨辛酉合祭天地于明堂大赦蠲  
襄陽等六郡三年租稅庚午朱勝非罷金齊合兵自  
淮陽分道來犯壬申渡淮楚州守臣樊釵棄城去韓  
世忠自承州退保鎮江府癸酉以趙鼎爲尚書右僕  
射同中書門下平章事兼知樞密院事吏部尚書沈  
與求參知政事冬十月丙子朔與趙鼎定策親征命  
張浚以軍援淮東劉光世移軍建康車駕擇日進發  
丁丑以孟庾爲行宮留守留統制王進一軍及神武

中軍五百人隸之百司不預軍旅之務者聽從便避  
兵己卯韓世忠自鎮江率兵復如楊州金人犯滁州  
以張浚爲浙西江東宣撫使金人圍亳州席益遣統  
制吳錫率兵討擒賊楊再興大破之壬午僞齊兵犯  
安豐縣癸未復以張浚爲資政殿學士提舉萬壽觀  
兼侍讀甲申復以王瓌爲建武軍承宣使江西沿江  
制置使丙戌命胡松年詣江上會諸將議進兵戊子  
韓世忠邀擊金人于大儀鎮敗之又遣將董旼敗之  
于天長縣鴉口橋己丑金人攻承州韓世忠遣將成  
閔解元合兵擊于北門敗之金人圍濠州甲午遣秘

書正字楊晨持詔撫諭四川遣侍御史魏玘監察御史田如鼇詣劉光世張浚軍中計事光世始移軍太平州丙申命後宮自溫州泛海如泉州金人陷濠州守臣寇宏棄城走丁酉詔州縣團教弓手土兵戊戌帝御舟發臨安劉錫楊沂中以禁兵扈從己亥韓世忠捷奏至命收瘞戰死將士仍令胡松年致祭庚子張浚率兵發鎮江如建康壬寅帝次平江加贈陳東歐陽澈祕閣修撰官其子孫二人各賜田十頃且追咎汪伯彥落觀文殿學士黃潛善更不追復命韓世忠楊沂中分兵控扼沿海要地癸卯焚決淮東閘堰

賜扈從諸軍錢乙巳仇愈遣將孫暉擊金人于壽春  
敗之復霍丘安豐二縣是月借江浙坊場錢一界以  
備軍費十一月戊申太白晝見庚戌賞承州水砦首  
領徐康等要擊金兵之功轉官有差仍蠲承楚泰州  
水砦民兵賦役十年置沿江烽火放浙東諸郡防城  
丁夫壬子始下詔聲劉豫逆罪諭親討之旨以厲大  
師吳玠遣統制楊從儀等率兵敗金人于臘家城癸  
丑玠乞納節贖劉子羽罪遂聽子羽自便金人入光  
州甲寅僞齊知光州許約破石額山砦遂據之乙卯  
韓世忠遣兵夜劫金人營于承州破之金人犯六合



縣丙辰掠全椒縣三城湖丁巳戒諸路大小臣僚借  
貸催科縱吏姦擾民及務絕盜賊之伺隙者命董昉  
趙康直總領淮東水砦戊午以胡松年兼權參知政  
事金人陷滁州劉光世移軍建康韓世忠移軍鎮江  
張浚移軍常州己未復命張浚知樞密院事以其盡  
忠竭節詔諭中外庚申宴犒守江將士癸亥劉光世  
遣統制王德擊金人于滁州之桑根敗之揭黃勝招  
諭湖賊甲子命滁和諸州移治保聚乙丑金人犯滁  
口己巳劉光世遣統制王師晟等率兵夜入南壽春  
府襲金人敗之執偽齊知府王靖廣賊區稠圍韶州

樂昌縣銓轄韓京遣兵擊斬之詔張浚視師江上十  
二月乙亥朔魏良臣王繪還自泗州軍前入見戊寅  
命都督府右軍統制李貴部兵屯拒福山鎮辛巳命  
中軍統制王進屯兵泰州防拓通泰壬午以樞密都  
承旨馬擴爲江西沿江制置副使丙戌吳倫遣兵攻  
臘家城破之丁亥聽兩淮避兵民耕種所在間田壬  
辰金齊兵逼廬州仇愈嬰城固守岳飛所遣統制徐  
慶牛皐援兵適至敗走之劉光世亦遣統制靳賽戰  
于慎縣張浚遣統制張宗顏擊敗金人于六合詔江  
浙荆湖十四郡各募水軍五百人名橫江軍兩浙十

郡沿江海州縣招捕巡檢土軍甲午程昌寓遣杜湛  
彭筠合擊楊欽破之己亥以來年正旦日食下詔脩  
闕政求直言庚子金人退師辛丑詔葬祭浙西江東  
二軍之死事者壬寅省淮南轉運司遣胡松年往常  
熟縣江陰軍沿江計議軍事癸卯金人去滁州

本紀卷第二十七

本紀卷第二十八

宋史二十八

開府儀同三司錄軍國事尚書丞相兼樞密使領經筵事都總裁  
長慶奉  
勅修

高宗五

五年春正月乙巳朔日有食之帝在平江府金人去  
濠州丁未戒諸軍戰陳毋殺中原民籍充金兵者命  
弼官田宅輸錢專充軍費戊申進廬秦二州守禦官  
屬各一官已酉詔前宰執呂頤浩等十九人及行在  
職事官各條上攻戰備禦措置綏懷之策免淮南官  
吏去職之罪仍令還任承州水砦統領仲諒復入楚

州庚戌張浚遣統領楊忠閔王進夾擊金人于淮南  
岸敗之降其將程師回張延壽辛亥淮東統制崔德  
明襲敗金兵于盱眙召張浚赴行在乙卯浚入見賞  
沿江監司帥臣供億之勞各進官一等戊午趣脩建  
康行宮己未詔減淮南諸州雜犯死罪釋流以下囚  
庚申置諸州軍教場選兵專習弓弩立格按試辛酉  
贈殿中侍御史馬伸左諫議大夫韓世忠劉光世張  
俊入見壬戌以世忠爲少保淮東宣撫使駐鎮江光  
世少保淮西宣撫使駐太平俊開府儀同三司江東  
宣撫使駐建康甲子酈瓊復光州降其守許約乙丑

罷淮南茶鹽提刑司置提點兩路公事官一員兼領  
刑獄茶鹽漕運市易事淮西要會州軍並置市易務  
戊辰詔川陝宣撫司招諭陷賊官民庚午命王進合  
江西廣東諸將兵討周十隆海賊朱聰犯廣州又犯  
泉州壬申劉光世韓世忠張俊入辭命升殿以光世  
世忠有隙賜酒諭釋之皆感激奉詔癸酉僞齊知毫  
州馬泰犯光州權州事王萃率兵拒之是月金主晟  
殂旻之孫亶立岳飛自池州入朝二月丙子以飛爲  
鎮寧崇信軍節度使命常州布衣陳得一造新曆丁  
丑帝發平江戊寅遣權太常少卿張銖奉迎太廟神

主于温州壬午帝至臨安進扈從官吏秩一等丙戌以趙鼎爲左僕射張浚右僕射並同中書門下平章事兼知樞密院事都督諸路軍馬岳飛爲荆湖南北襄陽府路制置使將兵平湖賊楊太丁亥吳璘楊政攻拔秦州執僞齊守胡宣金帥撒離曷來援政復擊敗之己丑詔建太廟壬辰命張浚詣江上措置邊防詔諭諸路宣撫制置司示以專任之旨以右司諫趙鼎論奏得體賜三品服丁酉進執政官秩一等以賞防秋之功戊戌詔淮南宣撫司撫存淮北來歸官吏軍民己亥直史館范冲上神宗實錄考異庚子詔翰

林學士孫近胡交修類編臣僚條具利害章疏以聞  
甲辰蠲湖南路上供三年是月僞齊商元冠信陽軍  
守臣舒繼明被禽死之閏月乙巳朔雨雹丁未胡松  
年罷戊申雪已酉留四川上供銀帛就充軍費乙卯  
以孟庾沈與求並兼權樞密院事丙辰併諸路提舉  
常平入茶鹽司罷福建鑄錢令轉運坑冶司辦集丁  
巳撒離曷欲犯秦州吳玠遣部將牛皓伺之遇于瓦  
吾谷戰死癸亥海賊陳感犯雷州官軍屢敗丁卯王  
瓌罷命戶部尚書章誼措置財用孟庾提領號總制  
司命川陝宣撫司幕僚攝司事仍權節制軍馬戊辰



置路分總管以處閑退武臣辛未復置宗正丞掌修屬籍再蠲荆南府歸峽二州荆門公安二軍歲貢上供二年三月甲戌朔以王瓌貪縱不武敗師誤國責授濠州團練使丙子遣樞密計議官呂用中等分使兩浙江東西路檢察經總制司財用丁丑詔侍從至監察御史館職已上在內館職在外侍從官監司帥守各舉所知充監司守令尋命館職專舉縣令己卯以韓世忠兼鎮江府宣撫使劉光世兼太平州宣撫使壬午以都督府參議軍事邵溥兼權川陝宣撫副使罷御前軍器所提舉官併隸工部壬辰命廣東福

建路招捕朱聰乙未初權鉛錫張浚親討湖賊丁酉  
復移浙西安撫司于臨安府庚子罷饒州牧馬監夏  
四月丙午貴池縣丞黃大本坐枉法贓杖脊刺配南  
雄州丁未遣司農丞蓋諒持詔撫諭川陝召解潛赴  
行在王彥知荆南府諸鎮撫使至是盡罷戊申太廟  
神主至自温州己酉以審量濫賞追左銀青光祿大  
夫王序八官及職名仍改正出身庚戌詔內侍遇特  
恩轉官止武功郎壬子訪得周後柴叔夏襲封崇義  
公戊午奉安太廟神主己未更免役保正長法甲子  
太上皇帝崩于五國城丙寅帝即射殿行朝獻景靈

宮之禮始以惠恭皇后祔祭募民耕營田官給牛種  
庚午省四川添差官辛未以諸路稅賦畸零增收錢  
專充上供是月龍圖閣直學士致仕楊時卒五月乙  
亥初謁太廟庚辰命邵溥吳玠裁省四川冗官浮費  
辛巳名行宮新作書院爲資善堂遣何鮮等奉使金  
國通問二帝中書舍人胡寅言國家與金世讎無通  
使之義張浚奏使事兵家機權後將闢地復土終歸  
於和未可遽絕乃遣行丁亥立殘破州縣守令勸民  
墾田及拋荒殿最格已丑以孟庾知樞密院事壬辰  
召張浚還行在丁酉詔浚提舉詳定一司勅令戊戌

以貴州防禦使瑗爲保慶軍節度使封建國公徽猷  
閣待制范冲兼資善堂翊善起居郎朱震兼讀讀以  
盛暑命監司行部慮囚己亥岳飛軍次鼎州庚子周  
十隆降辛丑命川陝訪求元祐黨人子孫六月甲辰  
封武經大夫令砮爲安定郡王湖賊楊欽全琮劉誥  
相繼率衆詣岳飛降乙巳名新曆曰統元丁未併饒  
州鑄錢司于虔州己酉命建國公瑗出就資善堂聽  
讀拜范冲朱震出內帑錢賜宗室貧者壬子復省淮  
南州縣冗官癸丑以久旱減膳祈禱禁諸路科率自  
租稅和市軍須外皆罷岳飛急攻湖賊水砮賊將陳

瑠降楊太赴水死餘黨劉衡等皆降飛急擊夏誠斬之丁巳湖賊黃誠斬楊太首挾鍾子儀周倫詣都督府降湖湘悉平得戶二萬七千悉遣歸業戊午減福建貢茶歲額之半庚申以旱罷諸路檢察財用官丁卯以賊平免沿湖民前二年逋租己巳罷福建諸州槍仗手秋七月壬申朔以仇愈爲沿海制置使甲戌免蘄州上供及租稅三年戊寅獎諭岳飛撫勞將士趣張浚還朝己卯孟庾罷以沈與求兼權樞密院事及措置財用壬午以金軍虜州隸襄陽府路僞齊兵寇湖陽縣執唐州守臣高青復釋之丁亥賜宇文虛

中家福建田十頃甲午詔殘破州縣親民官計到罷  
之日戶口考殿最韓世忠復鎮淮軍會僞齊守王拱  
丙申蠲湖南路上供米三年及秋租之半丁酉置高  
峯王口二砦都巡檢使益兵戍之八月壬寅朔罷荆  
南營田司令安撫司措置官兵耕種甲辰定館職額  
爲十八員壬子詔淮南山水砦都巡檢各聽守令節  
制癸丑蠲福建州軍借撥常平錢米己未下詔示章  
惇蔡卞詆誣宣仁聖烈皇后之罪追貶惇昭化軍節  
度副使卞單州團練副使子孫不許在朝命廣宮學  
教內外宗子辛酉詔淮南襄陽府等路團結民社丙

寅以諸盜平減湖廣江西二十二州雜犯死罪釋徒杖以下囚海賊朱聰降命補水軍統領是月偽齊陷光州九月辛未朔罷總制司所增收頭子等諸色錢乙亥賜禮部進士汪洋以下二百二十人及第出身唱名始遵故典令館職侍立殿上壬午加岳飛檢校少保偽齊兵寇固始縣統領韋旺拒戰却之尋復光州甲申命沿海州軍籍海舶分守要害乙酉趙鼎上重修神宗實錄壬辰詔元符上書邪等范柔中等二十七人各官一子以解潛部兵三千隸馬軍司甲午周十隆復叛犯汀州戊戌遣統領王進李貴討之冬

十月庚戌張浚入見乙卯以席益爲四川制置大使  
位宣撫副使上州軍兵馬並隸大使司邊防重事仍  
令宣撫司處置李綱爲浙西制置大使呂頤浩爲湖  
南制置大使戊午詔川陝類試合格第一人依殿試  
第三人例推恩餘並同賜進士出身特奏名進士命  
宣撫選官試時務策澧州賊雷德進降乙丑偽齊兵  
寇漣水軍韓世忠遣統制呼延通等逆擊敗之十一  
月庚午朔初置節度使以下金字牙符命都督府掌  
之給將帥立戰功者命州縣賣戶帖以助軍費癸酉  
詔守臣死節昭著者毋限品秩並賜謚乙亥徵和靖



處士尹燁于涪州命為崇政殿說書戊寅郊辛巳復  
置淮南提舉鹽事官壬午出宮女三十人甲申權減  
宰執及行在官吏奉乙酉以趙開為四川都轉運使  
丙戌命張浚視師荆襄川陝戊子知衡州裴廩坐調  
夫築城凍死二千餘人除名嶺南高州編管乙未出  
內帑綿絹賜宗室丁酉罷催稅戶長十二月己亥朔以  
岳飛為荆湖南北襄陽府路蘄黃州招討使楊沂中  
權主管殿前司併統神武中軍庚子改神武四軍及  
巡衛軍號行營五護軍辛丑以都督府兵隸三衙命  
左右司樞密院檢詳官參考中興已行條例修為定

法乙巳禁服用翠羽己酉免侍從官輪對庚戌汰橫  
江水軍三之一癸丑命兩淮川陝荆襄荆南諸帥府  
參謀官各一員提點屯田癸亥禁川陝州縣官悉用  
川陝人丙寅都督府遣參議軍事劉子羽主管機宜  
文字熊彥詩撫諭川陝且察邊備虛實戊辰夜雨雹  
六年春正月辛未蠲貧民戶帖錢之半無物產者悉  
除之癸酉命給事中中書舍人甄別元祐黨籍乙亥  
以內重外輕命省臺寺監及監司守令居職及二年  
者許更迭出入除擢丁丑詔凡入粟補官者毋授親  
民刑法之職壬午賜宗子伯玖名璩爲和州防禦使

罷綿州宣撫副使命吳玠專治兵事罷御史平反刑  
獄賞丙戌張浚視師荆襄入辭己丑安定郡王令砮  
薨庚寅還預借坊場錢辛卯詔監司帥臣慢令失職  
者令張浚黜陟以聞甲午振江湖福建浙東饑民命  
監司帥臣分選僚屬及提舉常平官躬行檢察戊戌  
命鬻通直郎閣門宣贊舍人以下官二月庚子以諸  
路宣撫制置大使並兼管田大使宣撫副使招討安  
撫使並兼管田使壬寅雨雪改江淮屯田為管田甲  
辰置行在交子務印交子錢引給諸路令公私同見  
錢行用戊申岳飛入見復以襄陽府路為京西南路

辛亥詔張浚暫赴行在奏事甲寅以兵部尚書都督  
府參謀折彥質簽書樞密院事乙卯韓世忠引兵攻  
宿遷縣統制呼延通與金兵戰敗之禽其將孛堇牙  
合澧州賊徒伍俊殺雷德進持其首詣鼎州降丙辰  
韓世忠圍淮陽軍復置諸路市易務戊午命楊沂中  
以兵萬人聽都督行府調遣己未遣戶部侍郎劉寧  
止如鎮江府總領三宣撫司錢糧辛酉兀朮救淮楊  
韓世忠引兵歸楚州壬戌以折彥質兼權參知政事  
癸亥沈與求罷李綱入見是月張浚至江上會諸將  
議事命張俊進屯盱眙三月戊辰朔初收官告綾紙

錢名均房州民兵曰保勝又命招刺三千人賜名必勝軍已巳以韓世忠爲京東淮東路宣撫處置使岳飛爲京西湖北路宣撫副使辛未蠲旱傷州縣民積欠錢帛租稅已卯趣岳飛如鄂州措置軍事辛巳以樞密副都承旨馬擴爲沿海制置副使壬午金齊兵犯漣水軍韓世忠擊敗之壬辰寬四川災傷州縣戶帖錢之半夏四月戊戌朔湖南賊黃旺犯桂陽監甲辰僞齊兵陷唐州團練判官扈舉臣推官張從之等皆死岳飛以母喪去官丙午詔飛起復己酉詔文武臣僚能決勝彊敵恢復境土者賜功臣號庚戌始訓

諸宗子名甲寅賞淮陽功呼延通等進官有差餘受  
賞者凡萬七千人劉光世遣副統制王師晟鄺瓊襲  
偽齊兵于劉龍城破之禽其統制華知剛己未命福  
建安撫司發水軍討海賊鄭慶辛酉禁四川伐並邊  
山林甲子以韓世忠為橫海武寧安化軍節度使號  
揚武翊運功臣除商旅緡錢稅丙寅復行在官吏奉  
蠲東京民渡淮南商販之稅五月戊戌朔禁以鹿胎  
為冠癸酉詔未經上殿臣僚先令三省審察然後引  
對戊寅以四川監司地遠玩法應有違戾令制置大  
使按劾壬午詔大理寺議獄不合即詣刑部關決刑

部不能定同赴都堂稟議賜吳玠四川戶帖錢十萬  
緡犒軍癸未禁淮南州縣收額外雜色租乙酉改交  
子為關子罷交子務庚寅以劉光世為保靜寧武寧  
國軍節度使壬辰以張俊進屯盱眙改崇信奉寧軍  
節度使甲午禁銷錢及私鑄銅器丙申詔監司慮囚  
不能徧及者聽遣官著為令六月乙巳朔夜地震已  
酉求直言甲寅張浚渡江撫淮上諸屯命劉光世自  
當塗進屯廬州岳飛自九江進屯襄陽楊沂中屯泗  
州戊午詔兩淮沿江守臣並以三年為任辛酉封  
集英殿修撰令慮為安定郡王秋七月壬申以司農

少卿樊賓提領營田公事癸未詔張浚暫赴行在癸巳罷川陝便宜差遣監司守貳以金州隸川陝路均房二州隸京西南路郭浩爲永興軍路經畧安撫使兼知金州閣門宣贊舍人邵隆知商州聽浩節制經理商號是月劉光世復壽春府八月己亥范宗尹薨庚子賜左司諫陳公輔三品服癸卯以徽猷閣直學士李迨爲四川都轉運使甲辰詔諭將士將親征岳飛遣統制牛皋破僞齊鎮汝軍禽其守薛亨乙巳命權殿前司解潛等帥精兵扈從主管步軍司邊順留兵守臨安知臨安府梁汝嘉爲巡幸隨軍都轉運使



丁未以秦檜爲醴泉觀使兼侍讀行宮留守孟庾提  
舉萬壽觀兼侍讀同留守戊申岳飛遣將楊再興復  
西京長水縣己酉命秦檜孟庾權參決尚書省樞密  
院事庚戌蠲虔州殘破諸縣逋負梅州夏秋兩稅聽  
廣東經畧安撫司便宜措置盜賊辛亥奉神主發臨  
安丁巳權罷經筵進講己未預借江浙民來年夏稅  
絕帛折米輸官庚申增給職事官米月三斛是月張  
浚城盱眙進屯泗州岳飛及僞齊李成孔彥舟連戰  
至蔡州克之僞守劉永壽舉城降九月丙寅朔帝發  
臨安岳飛遣統制王貴郝晷董先復虢州盧氏縣癸

酉帝次平江戊寅命職事官日一負輪對壬午岳飛以孤軍無援復還鄂州癸未權奉安神主于平江能仁寺戊子以戶部郎官霍蠡總領岳飛軍錢糧庚寅張浚入奏復如鎮江辛卯立賊徒相招首罪賞格賞鎮淮軍功進統制王德等官是月劉豫聞親征告急于金主亶求援亶不許豫自起兵三十萬命子麟趣合肥姪猷出渦口引兵分道入寇冬十月丙申招西北流寓人補闕額禁軍丁酉裁定淮南路租額劉麟寇淮西張俊遣楊沂中張宗顏等分兵禦之戊戌沂中至濠州劉光世已棄廬州而南俊遣人督還光世

不得已駐兵應沂中遣統制王德慶瓊及賊將崔臯  
賈澤王遇戰皆敗之賊兵攻壽春府芍陂砦守臣孫  
暉拒戰又敗之辛丑罷四川監酒官百餘員壬寅以  
梁汝嘉蕪浙西淮東沿海制置使前護副軍都統制  
王彥副之癸卯趙鼎請降勅諭張浚令光世沂中及  
張俊全軍引還爲防江之計甲辰又詔浚督將士僇  
力破賊皆未達劉猷犯定遠縣沂中進戰大敗之于  
藕塘猷挺身遁麟在順昌聞之拔砦去劉光世遣王  
德及沂中追麟至南壽春而還孔彥舟亦解光州圍  
而去戊申命解潛遣兵千人守青龍港口癸丑張俊

楊沂中引兵攻壽春府不克而還乙卯詔諸軍所俘  
人民給錢米遣歸丁巳惠州軍賊曾衮作亂庚申摧  
鋒軍統制韓京募敢死士夜襲破之衮尋出降壬戌  
日中有黑子沒十二月甲午朔詔降廬光濠等州死  
罪釋流以下囚召秦檜赴行在張浚入見請幸建康  
趙鼎請還臨安戊戌韓世忠攻淮陽軍及金人戰敗  
之辛丑城南壽春府壬寅趙鼎罷遣右司貲外郎范  
直方宣諭川陝撫問吳玠將士甲辰命都督府參議  
軍事呂祉如建康措置移蹕丙午折彥質罷丁未賞  
淮西功加張俊少保改鎮洮崇信奉寧軍節度使楊

沂中保成軍節度使殿前都虞候戊申命秦檜赴講  
筵供職孟庚爲行宮留守辛亥以資政殿學士張守  
參知政事兼權樞密院事丙辰以呂頤浩爲浙西安  
撫制置大使判臨安府丁巳以劉光世爲護國鎮安  
保靜軍節度使戊午詔凡因民事被罪者不許親民  
己未命辰沅靖澧四州以閒田募刀弩手三千五百  
人爲額右司諫陳公輔乞禁程氏學詔士大夫之學  
宜以孔孟爲師庶幾言行相稱可濟時用庚申以安  
化郡王王稟死節太原賜其家田十頃辛酉以山陰  
諸暨等四十縣爲大邑並命堂除

七年春正月癸亥朔帝在平江下詔移蹕建康蠲無  
爲軍統役一年置建康御前軍器局丁卯賞張浚以  
破敵功遷特進己巳發米萬石濟京東陝西來歸之  
民張浚入見甲戌罷都督府諸州市易官丁丑解潛  
罷以劉錡權主管馬軍司并殿前步軍司公事庚辰  
築采石宣化渡二城癸未以翰林學士陳與義參知  
政事資政殿學士沈與求同知樞密院事詔廣西帥  
臣訓練土丁保丁乙酉復置樞密使副知院以下仍  
舊張浚改兼樞密使丙戌禁諸軍互納亡卒西蕃三  
十八族首領趙繼忠等來歸丁亥以秦檜爲樞密使

何鮮范寧之至自金國始聞上皇及寧德皇后崩己丑帝成服下詔降徒囚釋杖以下辛卯夜東北有赤氣如火二月癸巳朔日有食之百官七上表請遵以日易月之制徽猷閣待制知嚴州胡寅請服喪三年衣墨臨戎以化天下帝欲遂終服而張浚連䟽論喪服不可即戎遂詔外朝勉從所請宮中仍行三年之喪丙申太平州火丁酉鎮江府火庚子遣王倫等使金國迎奉梓宮岳飛入見辛丑以日食求直言以久旱命諸州慮囚乙巳詔凡辟舉官犯贓罪罪及所舉官丙午吳玠置銀會子于河池丁未詔席益募陝西

河東河北兵二千部送行在充扈衛癸丑雨雹丙辰  
始御便殿果州守臣宇文彬等進禾登九穗圖俱奪  
一官罷之丁巳以岳飛爲太尉湖北京西宣撫使己  
未帝發平江三月癸亥朔次丹陽韓世忠入見命世  
忠扈從岳飛次之甲子次鎮江楊沂中入見命沂中  
總領彈壓巡幸事務乙丑蠲駐蹕及經從州縣積年  
逋賦丁卯以吏部侍郎呂祉爲兵部尚書都督府參  
謀軍事辛未帝至建康壬申詔尚書省常程事從參  
知政事分治癸酉減建康流罪以下囚蠲建康府太  
平宣州逋賦及下戶今年身丁錢岳飛乞併統淮西



兵以復京畿陝右許之命飛盡護王德等諸將軍旣而秦檜等以合兵爲疑事遂寢戊寅手詔撫勞將士進沈與求知樞密院事己卯尊宣和皇后爲皇太后庚辰以王彥兵隸侍衛馬軍司呂頤浩爲少保兼行宮留守孟庾罷甲申以劉光世爲少師萬壽觀使以其兵隸都督府張俊因分爲六軍命呂祉節制乙酉賜光世第于建康府丁亥命虔吉南安軍諸縣各募土兵百人責知縣訓練防禦盜賊是春廣西大饑李實變爲桃夏四月癸巳築太廟于建康以臨安府太廟爲聖祖殿戊戌修濬建康城池丁未岳飛乞解官

持餘服遂棄軍去詔不許戊申日中有黑子庚戌以  
張浚累陳岳飛積慮專在併兵奏牘求去意在要君  
遂命兵部侍郎兼都督府參議軍事張宗元權湖北  
京西宣撫判官實監其軍壬子張浚如太平州淮西  
視師庚申以信陽軍隸京西路罷淮南提點司東西  
兩路各置轉運兼提點刑獄提舉茶鹽常平事五月  
丁卯詔李綱趣捕虔吉諸盜壬申命禮官舉文宣王  
武成王熒惑壽星嶽鎮海瀆農蠶風雷雨師之祀甲  
戌以胡安國提舉萬壽觀兼侍讀趣赴行在未至而  
罷癸未以酈瓊爲行營左護軍副都統制甲申初試

樞密院都督府効士乙酉命侍從官通舉材堪知縣者二十人丙戌僞齊陷隨州己丑禁四川增印錢引六月辛卯朔改上惠恭皇后謚曰顯恭皇后岳飛入見壬辰命歲辰戌月祀大火配以闕伯乙未罷江淮營田司令諸路安撫轉運司兼領其事丙申以重脩神宗實錄去取未當命史館復加考訂丁酉岳飛引過自劾詔放罪慰諭之戊戌命劉錡兼都督府咨議軍事率兵戍廬州乙巳沈與求薨召王德以所部兵赴行在遣呂祉如淮西撫諭諸軍丙辰詔吳玠李迥共議四川經費贍軍恤民岳飛復職秋七月戊辰詔

侍從各舉可任監司郡守者一二人癸酉以旱禱於  
天地宗廟社稷甲戌嗣濮王仲湜薨癸未以久旱命  
中外臣庶實封言事甲申蠲諸路民積年逋租以建  
康疫盛遣醫行視貧民給錢葬其死者命踈決滯獄  
乙酉詔即建康權正社稷之位戊子詔戶部長貳迭  
出巡按諸路考究財賦利病違者劾之己丑詔諸路  
歸業民墾田及八年始輸全稅八月乙未以張俊爲  
淮西宣撫使駐盱眙楊沂中爲淮西制置使主管侍  
衛馬軍司劉錡副之並駐廬州命鄴瓊率兵赴行在  
戊戌瓊叛殺中軍統制張景等執呂祉及趙康直趙

不群以兵四萬人奔劉豫辛丑手詔赦廬州屯駐行營左護軍壬寅鄠瓊引兵至淮殺祉及康直釋不群使還劉錡吳錫至廬州以兵追之不及命張宗元往招之張浚乞去位甲辰以趙鼎爲萬壽觀使兼侍讀甲寅詔命官犯贓刑部不得擅黥配聽朝廷裁斷乙卯賜岳飛軍錢十萬緡招歸正復業人耕湖北京西閒田九月甲子上太上皇帝謚曰聖文仁德顯孝皇帝廟號徽宗皇后曰顯肅皇后丁卯韓世忠張俊入見乃命俊自盱眙移屯廬州壬申張浚罷癸酉命參知政事輪日當筆權三省事更不分治常程罷都督

府甲戌以堂諫累疏落張浚觀文殿大學士仍領宮  
祠丙子復以趙鼎爲尚書左僕射同中書門下平章  
事兼樞密使戊寅以廬州壽春府民遭酈瓊虜掠燬  
租稅一年己卯朝獻聖祖于常朝殿庚辰朝饗太廟  
辛巳合祭天地于明堂大赦召劉光世赴行在戊子  
禁諸路進羨餘以劉錡知廬州兼淮西制置副使冬  
十月庚寅朔詔仍舊開經筵辛卯命後省官看詳上  
書有可采者條上行之丁酉夜勅張浚安置嶺表戊  
戌趙鼎累請浚毋老改永州居住僞齊犯泗州守臣  
劉綱擊走之丙午命戶部郎官薛弼霍蠡同總領江

西湖廣五路財賦壬子統制呼延通王權等襲擊金人于淮陽軍敗之丁巳詔六參日輪行在百官一員轉對閏月癸亥贈趙康直徽猷閣待制乙丑蠲江東路月椿錢萬緡發米二萬石振京西湖北饑民丙寅尹焞入見命爲秘書郎兼崇政殿說書甲戌始作徽宗皇帝顯肅皇后神主庚辰韓世忠引兵渡淮逆擊金人于劉冷莊敗之辛巳李綱罷癸未復漢陽軍是月張俊棄盱眙引兵還建康十一月丙申賜吳玠犒軍錢百五十萬緡丁酉以知溫州李光爲江西安撫制置大使丁未金帥撻懶兀朮入汴京執僞齊劉豫

廢爲蜀王癸丑詔來春復幸浙西是月僞齊知臨汝  
軍崔席詣岳飛降十二月庚辰復置都大提舉四川  
茶馬監牧官丁卯祔徽宗皇帝顯肅皇后神主于太  
廟庚午以解潛權主管馬步軍司命韓世忠留屯楚  
州屏蔽江淮己卯詔内外大將及侍從官舉武臣智  
畧器局堪帥守謀議官者癸未王倫等使還入見言  
金國許還梓官及皇太后又許還河南諸州甲申城  
泗州丁亥復遣王倫等奉迎梓官是冬吳玠遣裨將  
馬希仲攻熙州鄭宗李進攻鞏州不克宗死于城  
下希仲遁還玠斬以徇



本紀卷第二十八